



País Inkómodu

Oinsá governu Australia haree ba Timor-Leste



Clinton Fernandes

2019

Iha 1769, tinan ne'ebé Portugal husik nia Fortaleza iha Lifau hodi ba hela iha postu komersiál kiikoan ida iha Díli, ró-ahi kiik inglés ida liu hosi Amérika-du-Sul nia pontu sul liu, pontu ne'ebé Tasi-boot Atlántiku hasoru malu ho Tasi-Boot Pasífiku. Ró-ahi ne'e, tama iha tasi-boot Pasífiku atu liu ba illa Tahiti. Nia liu ba ne'ebá tanba ema hotu hein katak iha loron 3, fulan juñu, 1769, pontu kiikoan ida sei dolar liuhosi loron oin, lori oras lima ho sorin nia laran. Pontu kiikoan ne'e mak Planeta Vénus. Mak ita bele karik hosi Tahiti, no hosi mós pontu kiikoan balu hosi fatin seluk iha mundu ne'e, sukat loloos tempu ne'ebé mak preziza gasta atu bele liuhosi loron oin, sientista sira bele kalkula ona distánsia hosi loron to'o mundu ne'e dook oinsá. Sira sei bele uza informasaun ne'e hodi buka planeta sira seluk nia ain-fatin orbitál.

Informasaun sientífika sira nune'e importante tebetebes ba la'o ho ró iha tasi-laran. Ho navegasaun loloos no momoos iha tasi-laran maka sei bele tulun país sira Europa nian atu harii (dezenvolve) didi'ak rota maritima komérsiu nian no bele mós hetan vantajem hasoru karavana sira hosi rai-maran, sira ne'ebé mak uluk liga Xina, Mediu Oriente ho Europa. Bainhira ró-ahi sira bele hakur tasi-boot, sira sei bele lori naha sira todan boot liu naha ne'ebé mak kuda-kareta sira bele dada liuhosi rai-maran. La kle'ur tan, país sira Europa nian bele domina dalan sira hosi tasi-laran iha mundu no harii kondisaun ba podér imperiál Europa nian. Hafoin sura tiha Venus nia la'o liu hosi loron oin iha Tahiti, kapitaun ró nian loke pakote ida ne'ebé nia governu fó ba nia molok nia sai hosi Inglaterra. Iha pakote nia laran iha ordem ida atu nia la'o liután ba Tasi-Boot Pasífiku hodi buka kontinente ida ne'ebé ema haktuir katak ezisti iha ne'ebá. Nia simu ordem atu buka, halo (dezeña) mapa, no reivindika barak liu di'ak liu ba Inglaterra, no foti dadus (informasaun) sientífiku kona-ba planeta sira, liña kosteira sira, ai-horis, balada sira no ema.

Klaru katak, povu Timor-Leste hatene tiha ona kona-ba kontinente boot iha sul ida-ne'e. Pontu kosta Australia nian besik liu ba illa Timór la dook to'o kilómetru 500. Anin rai-udan (monsaun) nian hú ho regularidade, nune'e mak iha fulan tolu nia laran tinan-tinan, ró ida sai hosi Timór bele to'o iha Australia iha loron uitoan de'it nia laran. Ita la hatene Australia nia liña kosteira ne'ebé mak navegadór sira deskobre tanba rai-nakdoko iha tinan 1755 halakon tiha biblioteka boot mapa nian iha Lisboa. Ita hatene de'it katak mariñeiru (ema-ró) Olandés sira uluk hetan duni Australia nia kosta norte, oeste no sul. Sira nia mapa ida ba

rejiaun ne'e, koñesidu liu iha mundu, mapa Dieppe iha 1536, karik mapa ne'e sira kria hosi informasaun ne'ebé mak sira foti hosi Portugal nia informasaun.

Mariñeiru portugues no olandés sira la hanoin atu tuur ka hela iha Australia tanba iha tempu ne'ebá laiha ema ida mak hatene katak ita ema bele hatama bee ba rai-maran hodi nakfilak ba rai-matak. Ema ida lahatene katak ró-ahi frigorífiku sira bele lori (trasnporta) na'an liuhosi tasi-boot sira ba fatin dook seluk. Ema ida lahatene katak murak minarai no gaz butuk loos iha tasi-kidun. Ema ida lahatene katak besi (ferru), riti, osamean ho murak minerál seluk, barak mak butuk hela iha rai-kidun. Rai seluk parese iha riku-soin barak liu, tanba sira iha ema barak ne'ebé mak sira bele konkista (kaer) no lori ba fa'an hanesan eskravu (atan). Fatin sira seluk iha ai, espesiaria no fibra barak. Timór, hanesan ezemplu, surat-hakerek sira, hosi navegasaun Xina nian iha sékulu XIII mai oin, mak foin temi. Komersiante ida hosi Xina dehan katak Timór iha "ai-kameli barak" no "bikan (belak?) osamean no osamutin, lensu seda hosi malae rain no lensu ho kór barabarak" mak fa'an iha basar. 1 Explorador portugues Rui de Brito hakerek ba Liurai D. Manuel I katak Timór soin ai-kameli, bani-been no banin-isin.

Grán-Bretaña hahú koloniza kontinente Australia hosi 1788 oinmai. Iha tempu ne'ebá, Grán-Bretaña mak potencia imperiál boot liu, iha mundu. Ema sira ne'ebé mak ba hela iha ne'ebá hatene kedas ona katak sira hetan benefísiu hosi forsa Impériu Britániku nian. Kolónia Australiana sira habelar an tama kontinente laran iha tempu ne'ebé Grán Bretaña mós habelar nia Impériu tama ba parte barak Azia nian. Liu tinan 175 nia laran, Grán-Bretaña hasai ekivalente ho triliaun \$45 hosi India hodi investe iha fatin sira hanesan Australia, Afrika-du-Sul, Sul-Amerika no Kanadá. 2 Podér militar Grán-Bretaña nian mak fó protesaun sira-nia investimentu. Kolónia Australiana sira laran nakloke ba Impériu Grán-Bretaña. Iha tpmu ne'ebá, kolónia osidentál sira mak domina investimentu iha sira-nia kolónia iha Azia: Fransa iha Indoxina, Olanda iha Indonesia, Portugal iha illa Timór nia parte Lorosae, Grán-Bretaña iha Malasia, Estadus Unidus iha Filipinas. Australia la fó apoiu ba movimentu independentista sira iha Asia. Nia hatuur an hosi impériu sira Europa nia sorin, envezde halo kampaña ruma ba Liberdade ka libertasaun nasionál iha Asia.

1 L. Eccles, "Early Chinese Accounts of Timor" in *Studies in Languages and Cultures of Timor-Leste*, Vol. 6. (Dili: National Institute of Linguistics, 2004), 179.

2 Utsa Patnaik, "Revisiting the 'drain', or transfers from India to Britain in the context of global diffusion of capitalism", in Shubhra Chakrabarti and Utsa Patnaik (eds.), *Agrarian and Other Histories: Essays for Binay Bhushan Chaudhuri* (New Delhi: Tulika, 2017).

Iha 1901, kolonia neen (6) halibur hamutuk hodi harii *Commonwealth of Australia*. *Australia la sai independente bainhira kolonia sira harii Commonwealth of Australia*. Konstituisaun nia “asuntus externus” nia podér signifika katak governu nasionál iha podér atu lida ho governu britániku, la’ós ho seluk ruma, ne’ebé de’it, iha mundu tomak. Australia iha tempu ne’ebá laiha nia polítika rasik ba relasoens externas ka ba defeza.³

Australia ladún iha kontaktu barak ho Timór Portugés molok Funu Mundiál II. Empreza Australiana uitoan de’it maka ba harii sira-nia negósiu iha ne’ebá, no ligasaun komersiál kuaze la ezisti. Iha Funu Mundiál I, mosu sujestaun ida atu Australia okupa tiha Timór Portugés hodi bele sai fatin férias bailoron ba Australianu sira hosi norte Australia. Primeiru-Ministru Andrew Fisher hatudu interese ba haoin ida-ne’e, maibé la kle’ur de’it, hanoin ne’e rejeitadu tiha, tanba, tuir Sekretáriu ba Asuntus Externus Australia nian, Atlee Hunt dehan, “mak sira ne’ebé moris iha Norte iha kbiit atu ba to’o dook nune’e ba goza férias bailoron, karik sei iha possibilidade boot liu atu sira hili atu ba sul ... sira sei hetan liután vantajem tanba bele ba besik sosiedade sira-nia belun no parente sira-nian duké la’o fali ba fatin ruma hanesan Timór.”⁴

Lider sira Australia nian la honoin kona-ba Timór Portugés, exsetu bainhira isuisu hahú halai ba-mai katak poténsia estrangeira balu hanoin hela atu sosa tiha Timór Portugés hosi portugés sira. Nu’udar ezemplu, jornál Olandés ida iha 1932 hakerek katak Japaun iha intensaun atu sosa Timór hosi portugés sira. ⁵ Governu Portugés kontakta kedas ofisiál sira Australia nian no asegura ba sira “katak reportajem ne’e laiha liu fundamentu ruma.” ⁶ Isuisu sira ne’e sempre mosu dala balu, maibé Portugal nega beibeik nafatin.

Hafoin Funu Mundiál II nakfera, autoridade sira Australia nian neon-lametin ho empreza japonés balu ne’ebé hatuur an tiha ona iha Timór Portugés. Sira hahú hamta’uk intervensaun militar hosi rai li’ur ba territóriu. Maibé, Japaun laiha intensaun ruma atu haruka forsas ba Timór Portugés. Biar durante sira-nia marxa ba Azia laran, sira nunca hatama Timór Portugés ka Portugal nia kolonia ida seluk Macau, iha sira-nia lista objetivu funu nian.

³ Bill Hudson and Martin Sharp, *Australian Independence: Colony to Reluctant Kingdom* (Carlton: Melbourne University Press, 1988), 28.

⁴ Atlee Hunt, Memorandum to the Minister of External Affairs, 25 May 1915. NAA: A3, 15/2373.

⁵ Batavisch Nieuwblad, 11 October 1932. NAA: A981, W12423/11068/36.

⁶ Letter from C. Howard Smith to V.C. Duffy, 19 October 1932. NAA: A981, W.11243/11068/36.

Hafoin Japaun hamonu bomba hodi halo nakfera iha Estadu Unidus nia kolonia Hawaii iha loron 7 fulan dezembru, 1941, Governu Britániku husu ba Governu Australia atu haruka tropa ba Timór Portugés, no fó-hatene mós katak Portugal konkorda ho planu ne'e. Iha tempu ne'ebá Governu Australia ladún iha rekursus, maibé nia konkorda ho pedidu Britániku ida-ne'e. Nia dehan Portugal tenke fó uluk aprovasaun públiku ba misaun ida-ne'e. Bainhira Grán Bretaña asegura ba Australia katak arranju hotuhotu prontu ona, Australia fó ordem ba nia forsa sira atu ba tun iha Timór Portugés maske autoridade Portugés sira ladaun fó sira-nia aprovasaun. Bainhira forsa sira Australia nian to'o daudaun ona, Portugal nia Sekretáriu-Jerál Dr L. Teixeira de Sampaio nia reasaun "desfavoravel maka'as tebetebes. 7.

Bainhira ofisiál australianu sira to'o iha Díli, Sr. Ferreira de Carvalho, Governador ba Timór Portugés, hatete ba sira katak Portugal nia "pozisaun kona-ba konfliktu maka neutralidade total, no ... laiha agresaun ruma, oinsá de'it, mak mosu ona mai ami-nia territóriu. ... Nune'e forsa ne'ebé de'it mak tun iha territóriu ida-ne'e, sei konsidera nu'udar violasaun ba neutralidade ami-nia territóriu nian."⁸ Ferreira de Carvalho dehan mós ba Primeiru-Ministru Australia nian, John Curtin, katak nia "protesta maka'as hasoru agresaun, kontráriu tebetebes ba prinsípiu lei nian, ne'ebé mak mosu daudaun ba territóriu Portugés, hosi Olandés no Australianu sira, sira hatete katak sira halo ne'e tuir instrusaun sira simu hosi Governu India Olandés tuir akordu ho Governu Komunidade Australia nian.⁹

Governu Australia dehan katak tenke halo duni intervensaun hodi defende Timór Portugés hasoru "agresaun Japonés" – buat ne'ebé nunca mosu iha territóriu ne'e. Ho laran-taridu, Governu Britániku husu ba Australianu sira atu lebele temi (mensiona) katak Grán Bretaña, oinsá de'it, iha ligasaun ruma ho operasaun ne'e, maske planu ne'e Britániku sira-nian. Biar ho laran-hirus tanba hatama sira iha situasaun susar ida-ne'e, Australianu sira konkorda. Grán Bretaña tuirmai husu deskulpa ba governu portugés, hodi hakfudik dehan katak komandante nivel kiik sira Australia no Olanda nian mak halo sasán la hanoin. 10

Primeiru-Ministru Australianu, ho laran-hirus mak konkorda atu Australia nonok nafatin hasoru portugés sira, maibé nia hakerek momoos eventu hotuhotu iha kabograma ida

⁷ Cable, Cranbourne to Curtin, 17 December 1941, received 18 December 1941. DAFP Document 202.

⁸ Translated Cablegram, Ferreira de Carvalho to Curtin, 18 December 1941. DAFP Document 200.

⁹ Cable, Cranbourne to Curtin, 17 December 1941, received 18 December 1941. DAFP Document 202.

¹⁰ Cable, Cranbourne to Curtin, 17 December 1941, received 18 December 1941. DAFP Document 202.

ba Grán Bretaña hodi asegura katak rejistu istóriku ne'e rai hela iha arkivu. 11 Nia fó-hanoin ba Grán Bretaña katak nia husu tiha ona ba Australia atu sira bele haruka "forsa simbólíka kiikoan ida" hamutuk ho forsa prinsipál olanda nian, atu nune'e, bele garante "Timór Portugés nia defeza hasoru agresan ka infiltrasan japoneza". Liu tiha loron rua, nia dehan, "ita-boot hatete mai ami katak Portugal konkorda uluk ona ho planu ne'e". Ne'eduni, "biar ami nia rekursu limitadu tebetebes", nia hatutan, "ami simu ita-nia pedidu" tanba ami laran-kmanek ho "Governu Portugés nia konveniénsia atu fó apoiu públiku ba operasaun ne'e". Ho Grán Bretaña nia pedidu, primeiru-ministru John Curtin hatutan, mak "ami muda tiha momentu atu forsa sira tun, liu oras rua resin, hafoin konsulta formal ba governador portugés". Maibé "hafoin expedisaun liu tiha mak ami rona fali, hosi ita-boot, katak governu portugés tekitekir nakfilak ba má-vontade no la brani ona. Grán Bretaña lakohi Australia atu temi Grán Bretaña nia ligasaun ho operasaun ne'e, maske buat hotu planu Grán Bretaña nian. Tanba ne'e, bainhira Governadór Timór Porugés protesta diretu hasoru Curtin, nia "la halo deklarasaun públiku ruma". Curtin dehan katak, tuir Australia nia hanoin, "Portugal devía hetan uluk informasaun katak, tuir nia opiniaun, okupasaun ne'e bazeia ba nesesidade militár no katak agresan ka invazaun japoneza ne'e ho dalan seluk, teri netik ladi'ak". 12

Ne'eduni faktu sira istória nian momoos loos, maske ai-knanoik sei iha nafatin haktuir katak Australia uluk haruka tropa ba Timór Portugés hodi duni sai forsa japonés sira. Ohinloron ema barak la komprende saida mak mosu iha tempu ne'ebá. Maibé povu Timor-Leste terus barak, ema rihun 40 to'o 60 mak mate tanba ne'e¹³. To'o ohinloron laiha ema ruma hala'o investigasaun internasionál kona-ba krime sira ne'ebé forsa sira Australia no Japaun nian komete. Povu Timor-Leste nunca simu buat ruma ba hadia sira-nia sofrimentu tanba funu iha konfliktu ida-ne'e.

Iha tinan 1975, Indonesia invade Timor-Leste no okupa ba tinan 24 nia laran ho apoiu diplomátiku no materiál hosi estadu Osidental sira, Australia mós tama hamutuk ho estadu sira ne'e. Ema timoroan besik rihun 204 mak mate tanba de'it invazaun no okupasaun ne'e. Númeru hirak ne'e reprezenta karik ema mate barak liu kona-ba totál populasan hosi tempu

¹¹ Cable, Curtin to Cranbourne, 26 December 1941. DAFP Document 225.

¹² Cable, Curtin to Cranbourne, 26 December 1941. DAFP Document 225.

¹³ The Timor-Leste Commission for Reception, Truth and Reconciliation (CAVR), *Chega! The Final Report of the Timor-Leste Commission for Reception, Truth and Reconciliation*, Volume III – The History of the Conflict (Dili: CAVR, 2005), 10.

Holokaustu to'o ohin loron. Governu Australia sira, tutuir malu, fó apoiu diplomátiku no apoiu seluk tan ba okupasaun ne'e nia moris.

Iha ninia luta ba ukun-rasik an, Indonesia nunka hatudu interese ruma atu aneksa Timor-Leste. No mós la hatudu interese ruma hanesan iha períodu parlamentár liberál hosi 1950 to'o 1959. Dr Subandrio, tempu ne'e Ministru Negósius Estranjeirus, nega momoos reklamasaun ruma ba Timor-Leste iha nia submisaun sira ba Primeiru Komité Assembleia Jerál Nasoens Unidas nian iha tinan 1961. Ida-ne'e sempre Indonesia nia pozisaun durante períodu Demokrasia Kontrolada nia tempu, hosi tinan 1959 to'o 1965 no iha dékada da'uluk Ordem Foun nian. Maibé bainhira rejime Ordem Foun General Suharto nian to'o iha podér, nia obriga hatama konseitu polítiku ida naran "masa flutuante" ne'ebé "ema iha vila sira" la'ós atu "gasta sira-nia tempu no forsa murak ba luta politika partidu no grupu sira-nian" maibé uza atu "tempu tomak haka'as an ba dezenvolvimentu". Nune'e, ema sira sai nu'udar "masa flutuante" ne'ebé "la kesi an permanenti nu'udar membru ba partidu polítiku ne'ebé de'it."¹⁴

Ordem Foun ne'e halo opozisaun maka'as tebetebes hasoru komunismu. Nia taka tiha ligasaun ba grupu Indonesia Katóliku ida ne'ebé mak mosu hosi eskola elite sira jesuita nian hanesan Canisius College (koñesidu liu iha Indonesia nu'udar Kolese Kanisius) no grupu oiain hosi estudante universitáriu sira hanesan Association of Catholic Students of Republic of Indonesia (Perhimpunan Mahasiswa Katolik Republik Indonesia – PMKRI). Faktu maka hafoin Suharto sa'e ba podér, PMKRI – grupu Xinés Katoliku ida – tau hikas sira-nia naran Centre for Strategic and Independent Studies (CSIS), ne'ebé joga papél importante iha invazaun ba Timor-Leste. PMKRI nia membru prinsipál sira tau hikas sira-nia naran, hodi hili naran la'ós xina nian. Indonesiu influente barak, katóliku no naun-katóliku alumni iha Canisius College: polítikus balu Akbar Tandjung, Ginandjar Kartasasmita, Marzuki Darusman no Rachmat Witoelar, governadór sira Jakarta nian Fauzi Bowo no Wiyogo Atmodarminto, comandante Kostrad nian Erwin Sujono, emprezáriu R. Budi Hartono, Sehat Sutardja, Pantas Sutardja Peter Gontha no Sofjan Wanandi, Xefe CSIS nian Jusuf Wanandi, analista polítiku Wimar Witoelar, no sira barak tan.

Grupú hosi padre jesuita sira harii Canisius College iha tinan 1927. Nia lori Saint Peter Canisius nia naran, jesuita ida iha sékulu XVI ne'ebé mak hala'o knaar importante ho defende

¹⁴ Ali Murtopo, *25 Years of Accelerated Modernisation*, in D. Bouchier and V. Hadiz, *Indonesian Politics and Society: a reader*. (London: Routledge, 20030, 45-46.

Katolisismu hasoru reforma Protestante iha Europa. Nia mak figura importante ida ba restaurasaun Igreja Katólíka iha Alemaña hafoin Reforma. Papa Piu IX mak beatifika Peter Canisius. Papa Piu IX mak uluk 'adversáriu inkontestável hasoru movimentu liberál hotuhotu ... iha polítika, kultura no teolojía.'¹⁵ Papa Piu IX mak hatama dogma infalibilidade papál (buat hotu papa halo ka hatete sempre loos hotu, nunca sala), no lasimu hanoin sira modernu: Asosiasaun kléríku no sosiedade Biblíka sira hetan kondensasaun; direitus umanus em jerál hetan kondensasaun, hanesan liberdade konsiénsia, relijiaun, ba imprensa, la'ó hamutuk ho kazamentu sivíl. Panteismu, naturalismu no rasionalismu, indiferentismu no latitudinarismu, sosialismu no komunismu, sira hotu, hetan kondensasaun no la halo diferensiasaun ruma entre sira.¹⁶

Padre katólíku indonesiu barak iha tempu ne'ebá influensiadu maka'as hosi Papa Piu XII nia pontu-de-vista anti-iluminista, pontifikadu hosi 1939 to'o 1958. Papa ida-ne'e mak remata tratadu internasionál ho Adolf Hitler, ne'ebé mak foi sa'e ba podér iha fulan balu nia laran, nune'e hodi fó nia rekoñesimentu ba negósius estrangeirus. Nia mantéin silénsiu iha públiku hasoru jenosídiu iha Funu Mundiál II, nia exkomunga tiha membru sira hotu ne'ebé mak pertense ba partidu Komunista iha mundu tomak, maibé 'nia la hanoin netik atu exkomunga mós katólíku sira Hitler, Himmler, Goebbels no Bormann.'¹⁷

Iha Timór Portugés, mós, kléríku barak hala'ó tempu barak sira-nia karreira durante Piu XII nia era. Xefe Igreja Katólíka iha Timór Portugés maka Bispu Dom José Joaquim Ribeiro, figura konservadór ida ne'ebé mak defende maka'as status priviléjiu sira Igreja nian iha ne'ebá. Igreja simu subsidiu barak hosi estadu, izensaun ba impostus, pozisaun privilejiadu iha edukasaun no simu rai barak liuhosi konsesaun.

Iha tempu ne'e, líder sira FRETILIN nian influensiadu maka'as tebetebes ho klima intelektuál, kulturál no politika tinan sira 1960 nian. Mestri sira iha semináriu jesuita Dare nian, iha foho-hun Díli nian, sira mós influensiadu hosi ambiente hanesan, no hosi mós reforma sira Igreja Katólíka nian iha Konsíliu Vatikanu II (1962-1965). Konsíliu Vatikanu II hanorin fiar-na'in sira katak rekursu sira Igreja nian tenke serve lia-loos, dame no justisa, ho atensaun espeziál liu ba ema kiak no mukit sira. Lider nasionalista Timoroan barak ba tempu aban-bainrua nian simu ho laran-kmanek ambiente intelektuál estimulante Konsíliu Vatikanu II nian, iha tempu

¹⁵ Hans Kung, *The Catholic Church* (New York: The Modern Library, 2001), 160.

¹⁶ Hans Kung, *The Catholic Church*, 162-3.

¹⁷ Hans Kung, *The Catholic Church*, 177, 179.

sira hala'ó sira-nia estudus iha semináriu jesuíta, ne'ebé sira-nia mestri sira introdus sira-nia estudante ba hanoin foun sira.¹⁸

Lider sira FRETILIN nian kritika Igreja nia kumplisidade (sala-lisuk) ho kolonialismu Portugés, kritika mós sira-nia soin barabarak ho rai boboot sira kaer. Bispu Ribeiro kontra-ataka ho dehan FRETILIN komunista no bandu katóliku sira atu vota ba sira.¹⁹ Nia kontra-parte iha fronteira nia sorin balu, Bispu Theodore van den Tillart iha Atambua, hamutuk tiha ho nia hodi dehan FRETILIN sira komunista. Nia fó-hatene ba Kardeal Australia nian Knox katak FRETILIN simu tulun hosi komunismu internasionál no halo abuzu barak ba direitus umanus. Kardeal Knox tuirmai ba servisu iha Vatikanu.²⁰ Pro-Nuncio Apostóliku iha Jakarta, matebian Vincenzo Farano, nia mós figura ida Igreja nian ne'ebé mak tulun pinta FRETILIN hanesan komunista. Nia oferese jantár iha nia rezidénsia ofisiál iha Jakarta ba embaixadór sira seluk. Diplomata estrangeiru ida ne'ebé partisipa mós iha jantar balu lembra katak 'ofisiál indonesiu sira bainhira tuur iha meza, sira ko'alia kona-ba Xina ho Cuba nia interferénsia iha Timór no perigu ne'ebé mak ida-ne'e reprezenta ba rejiaun. No klaru katak embaixadór hirak ne'ebé tuur haleu meza, sira la hatene liu buat ida kona-ba situasaun, hodi simu liafuan sira ne'e nu'udar informasaun.'²¹ Tuir kedan invazaun, Vatikanu hili pozisaun ida ne'ebé mak bispu hirak ne'e suporta. Misaun barabarak ba to'ó Vatikanu iha tinan sira tuirmai no sira kestiona ba malu kona-ba oinsá mak situasaun iha Timor-Leste bele aat liu hanesan agora. Sira dehan katak klerigu sira-ne'e mós responsavel ba situasaun ne'e. Tuir loloos, marka 'Komunista' ne'ebé mak Indonesia tau ba FRETILIN iha Timor-Leste mak refleto Vatikanu nia má-vontade hasoru Katolisismu pos-Vatikanu II nian.

FRETILIN nia programa haree liu ba deskolonizasaun, reforma agrária (reforma rai), populasaun nia edukasaun no harii indústria kiik sira bazeia ba produktu primariu sira hanesan kafé. Intel Australia nian informa katak FRETILIN nia lider sira 'temi beibeik katak presiza harii sistema polítiku ida di'ak liu, adekua liu ba ambiente ekonómiku no sosiál iha Timor-Leste independente. Bele haree katak sira kompromete an tebetebes atu harii kooperativa iha komérsiu no agrikultura hanesan dalan atu bele hadi'ak liután ema Timoroan sira-nia moris-di'ak no kbiit ekonómiku. Biar nune'e sira garante beibeik katak akordu livre-inisiativa ho

18 CAVR, Chega, 7.1, p. 68.

19 Patrick Smythe, *The Heaviest Blow: The Catholic Church and the Timor-Leste Issue* (Munster: Lit Verlag, 2004), 36.

20 Patrick Smythe, *The Heaviest Blow*, 72.

21 Juan Federer, in discussion with the author, Paris, 12 June 2009.

empresáriu Xínés sira no ho kompañia estranjeiru sira sei kontinua nafatin ba oin.’ Michael Curtin, xefe seksaun Indonesia iha Australia nia Departamentu Relasoens Internasionais, hakerek katak FRETILIN mak ‘hanesan partidu ida ne’ebé mak ita hakarak atu iha, no enkoraja, ba fatin seluk ruma maibé la’ós ba Timór.’²²

Biar nune’e, FRETILIN nia kompromisu atu servisu iha aldeia sira no ho nia buka atu tuir reforma agrária no edukasaun ba povu, hasoru kedan Ordem Foun nia noin-aat ba atividade polítika iha nível aldeia iha Indonesia. Opozisaun ba mobilizasaun iha nível aldeia mak sai nu’udar prinsipiu baze ba rejime Ordem Foun. Karik FRETILIN bele sai ezemplu di’ak ida alternativa demokrátika nian iha arkipélagu Indonesia nia klaran. Ida-ne’e la’ós atu dehan katak FRETILIN modelu ida ba pensamentu polítiku kore-an nian; maibé kontráriu, nia servisu ba mobilizasaun ema sira iha vila laran Timor-Leste nian mak intolerável tanba públiku Indonesiu, bele, karik, bele haree alternativa ne’e hetan susesu hasoru Ordem Foun iha sira-nia área jeográfika. Ukun- na’in sira komprende ona rejime Indonesia nia laran-taridu. Michael Curtin rekoñese buat ida-ne’e momoos bainhira nia hakerek:

Mak Timor-Leste ida independente no, ho polítika radikál, halo ida-ne’e karik, ho tulun polítiku no ekonómiku ne’ebé mak la monu ba Indonesia nia gostu, konserteza hanesan buat foun ida ne’ebé mak mosu ba ema Indonesia sira deskontente atu haree.²³

Indonesia uza pretextu anti-komunismu hodi buka justifika nia opozisaun ba Timor-Leste atu ukun-rasik an. Indonesia reklama – laho razaun – katak komunista hosi Xina koko atu tama iha Timor-Leste, no katak Timor-Leste sei fó baze naval ida ba Uniaun Soviétika hodi fahe tasi Indonesia nian ba zona rua, katak Vietnam bele haruka tropa ba Timor-Leste, no alegasaun seluk falsu mós inspiradu hosi Gerra Fria nian.

Australia nia Primeiru-Ministru akonsella Indonesia nia Prezidente, Suharto, katak nia “a-favór ba integrasaun maibé tenke respeita auto-determinasaun”. Ofisiál Indonesia nian ida, ikusmai, komenta katak “to’o loron ne’ebé Sr. Whitlam ba vizita Jakarta sira sei laran rua-rua hela kona-ba Timór. Maibé Primeiru-Ministru ne’e nia apoiu ba ideia inkorporasaun ba

²² NAA: A1838, 3038/10/2, ii.

²³ NAA: A1838, 3038/10/1/2, ii.

Indonesia maka tulun sira hametin liután sira-nia hanoin rasik no agora sira konvensidu metin loos kona-ba dalan ida-ne'e nia bom-sensu."

Indonesia aselera liután nia kampaña dezestabilizasaun no terror, no ikusliu, iha loron 7 dezembru 1975, nia tama ho forsa iha Timor-Leste hodi buka manán FRETILIN iha batalla, oho nia lider sira no hamate organizaun politika sira ligadu ba sira ne'e. Iha fulan rua nia laran, sentru populasionál boot sira monu hotu ba Indonesia nia liman laran. Iha fulan juñu 1976, iha maisumenus tropa kombattente 32.000 iha batallaun 28, ho suporte hosi partisan timoroan no pesoál defeza sivíl timoroan 3.000. Indonesia nia intensaun atu integra Timor-Leste hanesan nia provínsia 27 iha loron 17 fulan agostu 1976, Indonesia nia loron independensia rasik, maibé governu Australia, ne'ebé hakarak rekoñese duni konkista ne'e, dehan iha privadu katak loron 17 agostu "hatama sira ba konstranjimentu ida, tanba iha loron ne'e mak Parlamentu [Australia nian] atu halibur fali". Nune'e, Indonesia muda loron ne'e fulan ida mai kotuk, no fo-hatene ba públiku loron integrasaun iha loron 17 fulan jullu 1976, durante resesu Parlamentu Australia nian.

Lider sira FRETILIN nian organiza hikas estrutura nasional sivíl no militar partidu nian atu bele hahú funu gerrila ida ba tempu naruk. Iha konferénsia ida iha Soibada (15 maiu-2 juñu 1976), sira fahe area sira iha zona militar Indonesia kontrola nia liur, koñesidu nu'udar zonas libertadas, ba setór neen, no tau setór idaidak iha komandu politiku no militar nia okos. Reorganizasaun ne'e lori rezultadu dí'ak tanba populasaun barak iha aldeia sira adere ba rezisténsia armada, ne'ebé mak aproveita frakeza seguransa indonesia nian hodi serka postu militar avansadu sira no halo emboskada ba 'konvoy' sira ne'ebé lori hahán. Timor-Leste nia estrada sira barak aat tanba tráfégu todan militar indonesia nian no tanba mós udan boot ne'ebé halo rai halai. Sira hosi lojística militar Indonesia nian la tahan ho situaun ne'e. Unidade kombatante sira labele simu ai-han ho tempu, no batallaun 15 infantaria no mariña nian labele halo buat barak liután, halo de'it mak patrulla kiikoan-kiikoan.

Iha fulan dezembru 1976 nune'e, FRETILIN bele duni sulan forsa sira indonesia nian iha impase militar nia laran. Nia bele organiza sociedade funksionál ida atu moris iha foho leten. Nia bele organiza ai-han natón ba sira no kria kuidadus saúde báziku ba ema sivíl rihun ba rihun ne'ebé mak halai hamutuk ho sira to'o iha ne'ebá. Eleisauun jerál iha Indonesia iha fulan maiu 1977 presiza aloka soldadu rihun sanulu resin-haat (14.000) hosi Timor-Leste ba fatin seluk iha Indonesia laran ba seguransa pre-eleitorál. Nune'e satan netik komandante militar

indonesiu sira atu rekupera fali inisiativa, eleisaun ne'e loke dalan ba FRETILIN atu rekruta, treina no reorganiza tan.

Podér iha loro-leten hafoin maiu 1977

Indonesia halo hikas operasaun militar hafoin eleisaun iha maiu 1977. Ninia estratejia bazeia ba avaliasaun ne'ebé nia halo, atu hamate tiha FRETILIN iha fulan janeiru 1978 nia remata, tanba udan boot sei obriga atu para operasaun to'o ona iha tempu ne'ebá – hanesan sira hatene tiha ona iha final janeiru 1977. Sira hakarak taka dalan ba oportunidade ida tan atu FRETILIN halibur-an hikas, rekruta no treina hikas. Hahú hosi agostu 1977, sira hahú utiliza aviaun Bronco OV-10F ne'ebé sira sosa hosi USA. Aviaun Bronco nia importansia maka nia bele tun no sae hosi aeródromu simples, no tan nia velocidade kiik iha loro-leten halo nia bele haree momoos aldeia sira no ataka loloos alvu. Aviaun ema halo ho duni espesial ba operasaun sira hanesane'e.

Ho podér ofensiva hosi loro-leten sira buka área agrikultura no fatin seluk ne'ebé bele prodús ai-han hanesan to'os-laran iha zona libertada sira, ne'ebé ema sira moris hamutuk ho FRETILIN, no baze apoiu, ne'ebé haleu zona libertada sira. Forsa loro-leten Indonesia nian sira utiliza napalm, ne'ebé mak sira sosa hosi USSR iha 1962²⁴. Tuir sobrevivente sira-nia testemuña iha Timor-Leste nia Komisaun ba Resepasaun, Verdade no Rekonsiliaun:

Ezérsitu mai sunu fatin sira ho duut naruk. Ahi da'et lais, no la kleur ahi-han fatin tomak hanesan ema sunu ho gazolina. Ami ne'ebé mak ahi haleu, laiha tempu atu halai tanba ahi-lakan boot loos. Sira-nia estratejia ne'e halo ema barak halai la biban ... Hafoin ami halai sai, ha'u sei haree ferik ho katuas balu ne'ebé sira-nia família husik hela iha ne'ebá. Sira tuur hela. Mane sira hatais faru foun, tara belak iha sira-nia kakorok ho kaibauk iha ulun. Feto sira tau brinku ho korrente osamean, ho sira-nia fuk konde, tau hena-metan iha ulun hanesan sira atu ba misa. Ami hateke de'it ba sira maibé labele halo buat ruma. Inimigu sira sei tuir hela ami.²⁵

Hamlaha, Moras no Mate Hamutuk

²⁴ CAVR, Chega, 7.5.

²⁵ CAVR, Chega, 7.3

Moras no hamlaha mak obriga ema sivil sira husik tiha foho hodi tun ba rende (entrega an) ba forsa sira indonesia nian. Populasaun sira ne'ebé mai rende, ulukliu sira tau iha kampu trázitu no tuirmai sira haruka ba hela iha kampu restabelesimentu. Kampu trázitu sira besik ba baze militar lokal sira. Sira nia funsaun atu permiti militar indonesiu sira bele identifika membru rezisténsia nian no hodi halibur informasaun kona-ba rezisténsia sira iha ai-laran. Kolaborador Timoroan balu mak tulun militar indonesiu sira identifika membru sira rezisténsia nian iha kampu trázitu. Dala balu kolaborador sira ne'e identifika ema ne'ebé laiha ligasaun ruma ho rezisténsia, maibé tanba de'it sira iha ódiu ruma hasoru ema ne'e hosi kedas tempu molok invazaun.

Tortura no violasaun, baibain mosu iha prosesu interrigatóriu nia laran. Ema sira ne'ebé sira identifika nu'udar pertense ba FRETILIN ka ba nia liman kroat, sira ezekuta kedan ka halo interrogatóriu naruk no tuirmai ezekutadu. Lider FRETILIN sira-nia parente feto sira, dala barak sira halo hanesan eskravu seksuál ofisiál militar indonesiu sira-nian. Bainhira sira-nia destakamentu remata iha Timor-Leste, ofisiál sira dala barak transfere de'it sira-nia "direitu propriedade" ba inan-feto sira ne'e, ba ofisiál seluk. Inan-feto sira ne'ebé mak uluk iha ligasaun ho rezisténsia ka ne'ebé ema fiar katak nia hatene membru sira rezisténsia nia fatin, sira tenke ajuda militar indonesiu iha sira-nia misaun ba buka hodi harahun. Dala barak sira hetan tortura, violasaun bainhira sira tuir misaun hirak nune'e.

Kampu trázitu sira la preparadu atu tau-matan ba ema sira ne'ebé ba rende. Dala barak, barraka kiikoanoan de'it, halo ho tali-tahan ka duut manulain no sintina-fatin laiha. Dala barak, mahon ba sira iha kampu trázitu maka ai-hum okos de'it. Laiha kuidadu saúde ruma. Detidu sira-nia hahán mai hosi sira-nia to'os, maibé tanba to'os sira destruíu hotu, no sira la'ó loron balu molok atu ba rende, sira-nia kondisaun fraku loos bainhira sira to'o iha kampu trázitu sira.

Moras hanesan kólera, kabu-moras no tuberkuloze (miar ran) mak halo sira barak moras to'o mate de'it. Bandu detidu sira atu halo to'os ka atu ba buka rasik ai-hán ruma, maibé sira simu de'it hahán uitoan bainhira sira to'o iha kampu trázitu. Hahán ne'e, dala barak, sira bele fahe ai-han ba detidu maibé ho troka ho detidu sira-nia eransa familia nian, murak ruma, mortén ruma ka favór seksuál. Iha kazu balu, detidu sira tama iha xoke proteína hafoin han hahán, hodi hamosu "isin-malirin, isin-manas, espasmus bronkial, enfizema agudu, muta no

te-been.”²⁶ Hafoin liu tiha fulan tolu (tempu kle’ur liu bele hela iha kampu ida, depende ba regra ne’ebé mak vigora iha kampu ne’e), sira transfere detidu sira ba kampu restabelesimentu. Dala balu la haruka sira ba fatin ruma; kampu trázitu ne’e rasik mak hanaran fali kampu restabelesimentu. Tuir submisaun sekretu ba gabinete Australia nian iha novembru 1979, “besik ema rihun 200 mak hela iha sentru hirak-ne’e iha setembru 1979 nia hahú”. Estimativa seluk kona-ba ema iha kampu sira ne’e maizumenus ema hosi rihun 300 to’o 370 iha finál 1979.²⁷ La importa númeru ne’ebé mak loos liu, labele haluha katak populasaun Timor-Leste nian iha tempu invazaun Indonesia nian iha tinan 1975 besik rihun 650.²⁸ Dala ida tan, iha tempu ne’ebá ema la la’o arbiru hosi fatin ida ba fatin seluk, no mós laiha ai-han, ai-moruk, saneamentu no abrigo adekuadu. Nu’udar rezultadu mak hamlaha hamate Timoroan rihun-ba-rihun.

Análize demográfika ida konklui katak ema besik rihun 204 mate hanesan rezultadu hosi konflitu ne’e²⁹. Sira barak tebetebes mate tanba hamlaha, no ema mate barak liu iha periodu fulan 19 nia laran, iha tinan 1978 no 1979³⁰.

Koñesimentu kona-ba hamlaha – Diplomata Australianu sira

Ofisiál sira Australia nian simu konsellu, hosi fonte konfiável tebetebes, ho oras no loloos, kona-ba hamlaha katastrófiku ne’e. Hanesan ezemplu, iha 24 maiu 1978, embaixadór Australia nian, Tom Critchley no Primeiru Sekretáriu David Irvine husu ba Indonesia nia Brigadeiru-Jenerál, Adenan, Diretór-Jerál ba Relasoens Internasionais no Seguransa iha Indonesia nia Departamentu Relasoens Internasionais. Adenan aviza sira katak apoiante sira FRETILIN nian “laiha ona kilat-musan no ai-han.” Sira ne’ebé mai rende daudauk “mai ho kondisaun fíziku aat liu” no “hamriik de’it mós labele.” Momentu nune’e oportunidade di’ak ida atu oferese tulun umanitáriu diretu ba governu indonesiu ka atu presiona nia atu loke odamatan ba tulun umanitáriu bele tama. Maibé tulun sira nune’e sei la hetan konsentimentu atu tama iha fulan 17 nia laran tan, no ema mate aumenta beibeik tan.

²⁶ CAVR, *Chega* 7.3.

²⁷ John Taylor, *Indonesia's Forgotten War: The Hidden History of East Timor* (London: Zed Books, 1991), 88-90.

²⁸ Sarah Staveteig, *How Many Persons in East Timor Went 'Missing' During the Indonesian Occupation?: Results from Indirect Estimates* (Austria: International Institute for Applied Systems Analysis, 2007), 14.

²⁹ Sarah Staveteig, 2007.

³⁰ CAVR, *Chega*, p. 505

Liu tiha fulan ida (30 juñu 1978), Embaixadór Critchley no Acting Defense Attaché Captain R.J. Whitten konvida Jenerál Mohammad Yusuf, Ministru Defeza no Komandante Forsas Armadas Indonesia nian. Jenerál Yusuf hatete katak nia foin “mak fila hosi Timor-Leste” no katak “problema boot liu ida maka oinsá atu tau-matan ba inan-feto no labarik-feto rihun 270.” Embaixada hatete de’it katak “parese sira barak liu feto no labarik ne’ebé mak fahe-malu tiha ho ema-mane sira.” Embaixada komenta katak: numeru ne’e boot liu tiha karik mai ita, kuandu ita haree ba provínsia nia populasaun hamutuk sei maizumenus hosi rihun 500 no 600. Maibé, repete hikas ... ema hatene Jenerál Yusuf hanesan ofisiál ida ladún ko’alia barak, no ladún muda nia hanoin maibé iha okaziaun ida-ne’e, nia ho laran-loos no hatudu hanesan nia hetan konsellu didi’ak no hatene didi’ak ninia asuntu – Timor-Leste. Maske temi mós asuntu seluk ladún importante nia fila beibeik ba problema Timor-Leste nian¹⁷.

Ho liafuan seluk, Jenerál Yusuf dehan momoos katak katástrofe umanitária boot mosu daudaun iha Timor-Leste. Nia dehan katak asisténsia hosi ajénsia voluntáriu internasionál sira, Kruz Vermella Internasionál (ICRC) mós tama iha laran, sira sei simu ho di’ak. Maibé laiha akompañamentu no ema sira mate aumenta tan.

Sr. D. Campbell no Sr. P. Alexander hosi Embaixada Australia ba vizita Timor Osidental hosi loron 10-14 agostu 1978 tuir proposta ajuda ida hosi Inodonesia. Embaixada ne’e ba to’o Atambua. Nune’e, nia “apresenta oportunidade atu manán liután informasaun ruma iha jerál ... situasaun no mós sira ne’ebé ezisti ona iha fronteira sorin Timor Osidental nian”. Sira reporta katak situasaun iha Timor-Leste: grave liután ... [ema hatudu ba sira] fotografia balu foin hasai ... kona-ba refujiadu sira-nia kondisaun iha Bobonaro. Fotografia sira hatudu ema barak moras, labarik no inan-feto sira hamlaha no isin-kraes, hanesan loloos imajem sira hamlaha nian iha mundu tomak ... Refujiadu sira-nia kondisaun, sira ne’e barak mak to’o iha fatin ne’e ho kondisaun aat liu, mukit tebetebes. Indonesia nia autoridade “la halo buat ida” hodi muda uitoan situasaun ne’e. [sira rona estimativas] pelu menus 1,5% hosi refujiadu sira mate fulan-fulan no mós katak iha grupu balu taxa mortalidade besik 8% fulan-fulan. Bainhira husu tanba sá mak autoridade sira Indonesia nian la halo buat ruma hodi hasoru situasaun grave ida-ne’e, [ema dehan ba sira katak] liuliu tanba sensibilidade komandante militar lokál sira hasoru publisidade kona-ba situasaun krítika iha parte barak Timor-Leste nian. [Nia informante] la fiar katak autoridade sira iha Dili informa duni governu sentrák kona-ba problema nia gravidade ne’ebé mosu, iha parte balu, tanba Amnistia. Tanba ne’e mak nia hakerek foin daudaun ba Jenerál Benny Murdani iha Jakarta, hodi fó-hatene ba nia katak

presiza assisténsia urjenti hosi Governu. Maibé, saida mak nia simu ba problema maka xamada-de-atensaun hosi autoridade militar Dili nian ne'ebé semo ho helikopteru to'o Atambua hodi fó kastigu ne'e19.

Autoridade Australianu sira foti konkluzan katak "Governu Indonesiu ladun preokupa ho refujiadu barak nia kondisaun kritiku ne'ebé la hela dook ba fronteira Timór Osidental. Karik ida-ne'e tanba sensibilidade ba publisidade ka tanba problema lojístiku ruma, ladun klaru, maibé problema ne'e bele sai aat liutan ho adeptu FRETILIN nian barak ho isin-fraku tun hosi ai-laran mai, hodi buka atu simu amnistia Prezidensial. Maske, ho tulun hosi ajénsia internasionál sira, Governu parese bele duni kontrola situasaun refujiadu nian iha fronteira nia sorin osidental ho di'ak, iha Timor-Leste rasik situasaun aat ba beibeik iha fulan sanulu resin-rua liuba nia laran. Mak laiha medida maka'as ruma hosi governu, ema sei mate hamlaha nafatin ...". Iha ne'e ita bele haree tan avizu ida ba ema atu mate-mohu – no iha ne'e, dala ida tan, ema ida la halo buat ruma no ema mate aumenta beibeik.

Embaixador australia nian vizita Timor-Leste hamutuk ho embaixador nain 9 rai seluk nian, hosi loran 6 to'o 8 fulan setembru 1978. Embaixador sira simu informasaun katak maizumenu ema rihun 125 mak tun mai hosi foho (ai-laran), no sira barak, kal to'o baluk haat (1/4) ida nune'e, moras kólera, malaria, tuberkuloze (miar-ran) no isin-kraes maka'as. Embaixador ne'e dehan nia fiar katak vizita ne'e hetan kontrolu didi'ak hosi autoridade sira Indonesia nian, no bele haree momoos sira-nia laran la-metin kona-ba situasaun trájika refujiadu sira-nian ne'ebé sira haree labele fó kulpa ba sira-nia administrasaun. US nia embaixador, Ed Masters, konkorda, hodi hakerek katak "refujiadu sira ne'e simu hena ba hatais (roupa) no hahan atu hatudu de'it mai ami-nia benefisiu" maske karik sira-nia prosedimentu baibain mak ida-ne'e duni, nia hatutan. Nia dehan sira moris iha "situasaun ida halo ita laran-dodok. Labarik sira kabun-teek no ... ema boot barak moras malaria, isin-kraes no dezinteria. Iha mós kazu TB [tuberkuloze] balu."³¹ Embaixador barak fila ho laran-dodok tanba refujiadu sira-nia situasaun ne'e. Vizitante ida hakerek buat ne'ebé nia haree rasik. Tuirmai baluk ida hosi hakerek ne'e:

Semana-semana, ema barak mate-hamlaha, hatais hena-aat hodi bele taka de'it sira-nia isin ruin-maran balu, dada labarik ho matan kuak, kabun-teek no ain-lotuk sira

³¹ E. Masters, *Ambassador's visit to East Timor: GOI policy and possible US response*. US Embassy Cable to US State Department, 14 September 1978.

kle'uk no kanek, hodi tun hosi dalan, haleu bamai, iha foho-lolon atu bele to'o iha sentru rehabilitasaun Indonesia nian. Ema indonesiu sira fó hena-hatais foun ba sira hodi troka hena-aat sira hatais. Sira forma iha liña rua hodi simu ema bainaka sira, foti bandeira Indonesia mean-no-mutin iha liman hodi hakilar "Selamat Datang" ba embaixadór sira ne'ebé mak ba vizita sira. Ha'u bele haree momoos sira ne'ebé foin to'o iha ne'ebá no sira ne'ebé hela kle'ur ona, hosi sira-nia ain ruin-maran nakonu ho kanek. Sira hotu ho isin-kraes, balu maka'as liu, seluk ladun maka'as. Inan-feto sira book-an neineik, forsa laiha, sira-nia liman kaer ba bandeira hodi baku ba-mai bainhira bisibisi de'it mensajem boas-vindas. Iha estasaun Kruz Vermella nian ida, inan-feto timoroan ida toba iha maka iha rai, hatais de'it hena-aat, ho hena mutin kiik ida taka netik nia oin, satan netik hasoru lalar barabarak iha nia oin. Asesór médiku ida hosi Jakarta tama dala ruma ba sala ne'e, no baku tia lalar hosi nia matan. Rai-manas ita la terus. Nia foin mak tun hosi ai-laran loron rua liubá, no nia moras kólera, asesór médiku dehan mai ha'u. Xefe distritu dehan ba jornalista sira katak refujiadu nain 56 mate bainhira tun hosi foho mai, tanba moras no isin-kraes (ema ida la utiliza liafuan "mate-hamlaha"). Embaixadór vizitante sira laran-dodok loos ho buat ne'ebé sira haree. Sira balu doko sira-nia ulun atu la fiar buat ne'ebé sira haree daudaun. Embaixadór Papua New Guinea nian, Dominic Diya dehan mai ha'u: "ami país kiak maibé iha ha'u-nia moris ha'u ladauk haree buat ruma nune'e. Ha'u fuan-dodok loos ho haree refujiadu sira-nia kondisaun."³²

Australian Broadcasting Corporation nia korrespondente iha Jakarta, Warwick Beutler, halo reportajem ba Embaixadór nia vizita iha rádiu nasional públiku Australia nian:

"Embaixadór balu lahetan liafuan atu hatete kona-ba trajédia ema rihun-ba-rihun nian tun hosi foho mai, ho kondisaun saúde halo ita tauk. Embaixadór Papua New Guinea nian dehan iha nia moris nia ladauk haree ema ruma ho estadu ida aat tebetebes nune'e. Embaixadór Australia nian, Sr. Tom Critchley, dehan sira-nia kondisaun halo ita ne'on-susar ... Embaixadór Kanadá nian, Sr. Glen Shortliffe, hatete situaun ne'e problema umanitáriu boot ida"³³.

³² S. Chiang, Land of suffering, hunger and disease. Straits Times, 11 September 1978. .

³³ Australian Broadcasting Corporation, AM Program, ABC Radio, 11 September 1978.

Nia dehan katak enviadu sira barak liu konkorda katak (esforsu internasionál de'it mak bele evita atu ema balu mate tan." Embaixada Australia nian iha Jakarta haruka telegrama ida ba sede Negósius Estranjeirus iha Canberra ho sujestaun balu kona-ba oinsá bele lida ho kestaun sira iha Parlamentu kona-ba publicidade indezejada ida-ne'e. "Emar sira Timór nian," telegrama ne'e dehan, horiuluk kedas sira ema kiak duni, no sira barak nia moris loronloron ladún liu liña subsisténsia leten. Infraestrutura kuaze laiha, no problema boot ba tempu naruk maka dezvoltimentu. Rai kiak, taxa alfabetizasaun kiik liu no traballadór kualifikadu ladún barak. Ne'eduni ita bele komprende Governu Indonesia nia ansi atu garante katak referénsia ne'ebé de'it ba emar timoroan nia moris tenke klaru katak problema sei la repete ho Indonesia. Ho liafuan badak katak Timor-Leste país ida kiak molok funu sivíl hahú. Maske problema báziku la'os funu sivíl ne'e mak hamosu ka hahoris, maibé funu mai agrava liután de'it".

Hanoin hikas katak buat ida hanaran funu sivíl ne'e, buat Indonesia duni mak fomenta, dura de'it semana tolu nia laran iha agostu 1975, no halo ema, hosi parte hotu, mate lato'o rihun 3. Maibé Embaixada Australiana iha liu interese atu fó kobertura ba relasoens internasionais ba autoridade sira Indonesia nian. Nia buka fó kulpa ba kiak no funu sivil maibé la temi militar indonesiu sira uza napalm ka sira destroi área agrikola no fonte seluk ai-han nian, hanesan balada hakiak sira. Embaixadór Australia nian ba Indonesia, Tom Critchley, explika tansá mak Indonesia laiha vontade autoriza asisténsia umanitária internasionál tama iha Timor-Leste:

Maske ita, loos duni, labele repete lalika lekar iha públiku, ha'u fiar katak indonesiu sira bele ulun-fatuk toos atu buka ajuda hosi rai-li'ur, barabarak tebes iha Timor-Leste liuliu, sira sei ladún hakarak ema hosi rai-li'ur iha ne'ebá hodi administra. Mak Timoroan sira fiar-metin karik indonesiu sira, governu Indonesia tenke fiar servisu ajuda no dezvoltimentu. Indonesiu sira bele mós hakarak evita impresaun ruma katak asisténsia hosi rai-li'ur mak di'ak liu sira hosi Jakarta. Tanba ne'e, ha'u hein katak sira sei kuidadozu loos kona-ba atu simu asisténsia hosi rai-li'ur.

Tanba ema mate-hamlaha nafatin, militar indonesiu sira taka tiha Timor-Leste ba mundu. No la permiti nafatin ICRC atu tama, insisti katak ajuda ne'ebé de'it mak mai hosi rai-li'ur tenke liuhosi Kruz Vermella Indonesia nian, ne'ebé sira kontrola maka'as ninia operasaun.

Ajuda internasionál nia esforsu sei hein tan tinan ida, no populasaun, hamlaha, fraku no moras, mate nafatin.

Explokasaun ba Katástrofe ida-ne'e

Iha marsu 1979, militar Indonesiu sira haree ba situasaun, sira hanoin sira to'o ona ba objetivu sira funu nian; Sira manán ona FRETILIN iha batalla no lider senior barak mak sira elimina hotu ona. Sira ne'ebé sei restu hosi rezisténsia, sira agora grupu kiikoan balu de'it, gerrilleiru mal-ekipadu, no sira subar de'it iha foho-leten, dook hosi populasaun sira iha aldeia no vila sira. Nune'e, iha 27 marsu 1979, governu Indonesiu deklara katak Timor-Leste agora maus ona. Sira autoriza ICRC tama Timor-Leste ba da'uluk iha tinan haat nia laran hodi bele halo peskiza preliminar ida 'in loco'.

Iha novembru 1979, Departamentu Relasoens Externas Australia nian rekoñese katak mosu ona "publidade boot liután iha Australia" no "kritika hosi média sira hasoru governu Indonesia tanba nia husik situasaun nune'e bele boot ba beibeik". Nune'e, iha ona "mosu presaun maka'as hosi públiku ba governu atu nia bele aumenta tan nia kontribuisaun ajuda." Sira prepara apresentasaun ida hosi Gabinete hodi nota katak iha ona "problema umanitariu boot iha Timor-Leste. Timoroan sira besik 200.000 (rihun atus rua) presiza tebes ho urjénsia hahán no kuidadus médikus." Sira nota katak ICRC "hasoru difikuldade boot atu ba, ka iha ona Timór" no katak "iha Timór, kustu ba transporte (tokon \$3.3) representa menus uitoan kustu totál nia sorin baluk (1/2)" tanba "fatin sira ne'ebé presiza liu bele to'o de'it hosi loro-leten." Maske "helikopteru hosi RAAF [Royal Australian Air Force] disponível ba halo transporte ne'e sein kompromete sira-nia kompromisu ne'ebé iha ona" no "bele hetan rekursu popular iha Australia laran", sira "bele hamosu difikuldade ba Indonesiu sira." Tanba ne'e sira kontra fornese helikópteru sira RAAF nian maibé sujere atu oferese, iha nia fatin, dólar millaun (tokon) rua ba Governu Indonesia.

Ho possibilidade atu iha esforsu ajuda internasionál – no testemuña hosi rai-li'ur – governu indonesiu dezenvolve diskursu ida, atu nia bele explika situasaun susar ida-ne'e. Ba hamlaha, sira fó kulpa ba prátika agríkola subsisténsia Timoroan sira-nian, no kulpa mós bailoron naruk.

Hosi sira-nia sorin, diplomata Australianu sira prepara tiha ona “matadalan ida ba mídia” atu nune’e ministru Negosius Estranjeirus bele hasoru mídia sira-nia kestaun kona-ba dezastre ne’e. Ministru nia komentáriu, sira hakerek, tenke fokus liu ba “kestaun pozitivu ba saida mak bele halo dí’ak liu atu bele tulun Timoroan sira tuir sira-nia presiza, no hadook sira hosi análize mamuk sira kona-ba sala tempu kotuk nian, sura ema nain hira no se’e mak lori kulpa kona-ba saida.”

Maske, iha setembru 1999, governu Australia lideradu hosi Primeiru-Ministru John Howard asumi lideransa ba harii forsa internasionál ba manutensaun paz ida atu bele aseguara Timor-Leste nia ukun-rasik an. Importante mai ita mak atu komprende tansá buat ne’e la’o tiha nune’e.

Howard nia governu sa’e ba kaer ukun hafoin eleisaun federál iha fulan marsu 1996. Krize finanseira iha Azia ladauk mosu no presidente Suharto mak sei kaer hela ukun iha Indonesia. Australia nia opozisaun ba Timor-Leste nia ukun-rask an momoos no metin loos. Fulan balu molok Howard manán eleisaun, inan-feto rua tama iha embaixada Australia nian iha Jakarta, hodi eziji, sira hakarak hetan estatutu refujiadu. Tuirmai Timoroan nain 9 seluk ba hamutuk tan ho sira, sira hirak-ne’e haksoit liu de’it embaixada nia muru leten, hodi tama ba laran. Sira hotu eziji estatutu refujiadu. Governu Keating nian, ne’ebé mak kaer ukun iha tempu ne’e, buka taka dalan ba tátika ida-ne’e ho halo revista ema ne’ebé mak hakarak tama ba embaixada. Ema ne’ebé de’it mak hakarak ba husu viza tenke liu uluk hosi guarda indonesiu sira nia leet, guarda sira-ne’e mak sei hapara ema ne’ebé mak, sira haoin, atu ba husu azilu karik. Bainhira Alexander Downer sa’e ba ministru negósius estranjeirus, nia kontinua ho politika ne’e, no nia defende Keating nia governu nia pozisaun. Ba Downer revista ema ne’e la’ós buat dí’ak ida, maibé nesesáriu, no la oinseluk ho embaixada sira seluk halo iha país seluk ne’ebé mak iha potenciál atu mosu refujiadus.

Downer kontinua mós ho pratika nia antesesór nian ho alega katak Timoroan sira ne’ebé ba buka azilu, sira iha dupla nasionalidade, Indonesia ho Portugal nian. Tanba ne’e, sira-nia kbiit atu husu azilu ba Portugal signifika katak sira la kumpri ho definisaun loloos ba ‘refujiadu’. Parese la’ós importante katak Timoroan sira la simu sira-nia klasifikasaun nu’udar nasional Portugal nian, ka katak Portugal sei la fó nasionalidade ba sira ne’ebé mak la hakarak simu.

Iha novembru tinan ida-ne'ebá nian, delegadu barak hosi Australia viaja ba Malázia, sira ba tuir konferénsia internasionál kona-ba Timor-Leste. Koneferénsia ne'e para tia iha klaran tanba bandidu 200 hosi organizaun juventude partidu ne'ebé kaer ukun iha Malázia (United Malay Organization Youth) halai tama iha sala laran no ataka delegadu sira. Polísia Malázia nian la halo kedas buat ruma, haree de'it sira dudu no baku delegadu sira to'o minutu 20 nune'e, mak polisia foin atu intervém. Governu Australia nia resposta hatudu momoos loos sira-nia pozisionamentu. John Howard hahú dehan katak konferénsia ne'e proibidu no delegadu sira, la'ós governu Malázia, tuir buat laho legalidade kuandu sira ba partisipa iha konferénsia ne'ebé proibidu: "Bainhira ita iha país seluk ida, mak ema fó-hanoin ba ita katak buat ida-ne'e ka ida-ne'ebá proibidu, klaru ita tenke rona sira nia lia-menon, karik lae ita mak sei simu konsekuénsia hosi ne'e."

Maske, delegadu sira konferénsia nian la viola lei ruma Malázia nian. Bispu Katóliku iha Melbourne Hilton Deakin, delegadu ida ba konferénsia ne'e, dehan nia "simu lia-menon, no asesor legál konferénsia nian dehan bebeik ba nia, katak buat hotu la'o tuir lei." Maske ema hotu hanete ona katak governu indonesia sempre presiona governu sira seluk ASEAN nian atu lalika fó suporte ba ativismu internasionál ba Timor-Leste, governu Howard la presiza presau ruma hosi Indonesia. Ninia halalok tama iha parámetru sira ne'ebé harii tiha ona iha polítika Australia nian. Bainhira nia halo kritika hasoru delegadu sira, la'os ema sira apoiadu hosi governu ne'ebé ba ataka sira, Howard fó sinál kona-ba nia governu nia intensaun atu haforti liután Keating nia apoiu Indonesia ba kontrola Timor-Leste.

Sensibilizasaun internasionál ba Timor-Leste boot liután bainhira Premiu Nobel ba Paz entrega ba José Ramos-Horta rezidente no bazeadu iha Sydney, no ba Carlos Ximenes Belo bazeadu iha Díli nu'udar rekoñesimentu ba kauza Timorensen. Governu Australia desidi lalika fó publisidade ruma ba ida-ne'e. John Howard dehan nia "sei la tama iha polítika sira-ne'e. "Alexander Downer hili lalika dehan buat ruma, hakarak liu husik porta-voz mak halo komentáriu badak.

Bainhira rejime Suharto reprimi manifestante pro-demokrasia sira iha fulan jullu 1996, laiha deklarasaun ofisiál ruma hodi kritika ka desaprovasaun hosi ministru estranjeirus foun. Downer deklarata katak represaun militar ne'e buat 'asuntu uma-laran nian ida', no hein katak buat hotu 'rezolve ho lais'. Governu Australia sira konsege duni trava opozisaun rai-laran ho rejenta ativista pro-Timor-Leste nu'udar 'la realistiku'. Importante tebetebes, governu sira

Australia nian bele tuur neon-hakmatek ho sira hanoin katak sei laiha opozisaun parlamentar ruma atu argumenta maka'as fó apoiu ba Timor-Leste. Konsensu politika bi-partidária ne'e nakfera ho traballista sira-nia porta-voz kona-ba relasoens externas, Laurie Brereton. Iha janeiru 1998, Partidu Liberal Australianu halibur iha Konferénsia iha Hobart. Sira adopta nu'udar politika ofisiál partidu nian, formulasaun tuirmai:

“Partidu traballista (ALP ho sigla inglés) nia opiniaun maka sei laiha solusaun ne'ebé mak dura ba tempu naruk ba konflitu iha Timor-Leste laho prosesu negosiasaun ruma ne'ebé mak emar tomak Timor-Leste nian bele uza nia direitu iha aktu ruma ba autodeterminasaun.”

Hosi ne'e ba oin, governu Howard sei toba la dukur. ALP nia mudansa iha polítika – no hosi ne'e presau ba governu nia leten – mak fatór importante ida iha Timor-Leste nia Ukun-rasik an. Mudansa Bereton nian mai loke espasu polítiku ne'ebé mak uluk taka metin ba ema sira halo kampaña a-favór Timor-Leste. Presau beibeik ne'ebé nia halo mak signifika katak governu tuur lahakmatek ona: nia tenke tau ain ida ba kotuk, no tenke defende ninia postura iha públiku ne'ebé nakali ba beibeik liután. Suharto nia rejime mós laiha ona tempu ba hakmatek. Entre maiu 1997 no fevereiru 1978 iha protestu no problemas barak liután. Liuliu, iha protestu barak hosi estudante sira iha dezembru 1977 no janeiru 1978 iha universidade barak iha Indonesia.

Tanba presau ba Suharto nia leten boot ba beibeik iha fulan sira dala uluk tinan 1998 nian, represaun hosi militar sira hakanek ema barak. Estudante sira Universidade Trisakti iha Jakarta ne'ebé halo daudaun protesta, simu tiru hosi soldadu sira, no ema liu 1100 mak mate iha de'it Jakarta. Feto no labarik sira ho orijem xineza, sai alvu hosi kampaña sistemátika atu oho sira no viola sira. Governu Australia la kondena atosidade hirak ne'e, no lahalo buat ida ba hamenus koperasaun iha defeza.

Suharto tun hosi poder iha 21 maiu 1998 no Habibie simu pose nu'udar presidente.

Iha nia entrevista dah'uluk, hanesan ona presidente, iha loron 3 juñu 1998, Dr Habibie la temi referendum ruma iha Timor-Leste. Maibé, nia hetan kedan presau maka'as tanba ajitasaun boot ba beibeik iha ne'ebá, interese internasionál aas tebetebes ba tempu hafoin-Suharto, no nia nesesidade rasik atu harii ninia kredensiál demokrátiku. Ne'e hotu, mak halo

nia tenke hato'ó buat ida naran 'status espesiál' hafoin liu tiha semana ida, 'ho kondisaun ida katak, Timor-Leste tenke rekoñese uluk katak Timor-Leste parte integradu iha Repúblika Indonesia'.

Abilio Soares, governadór fantoxe Timor-Leste nian, konvoka sorumutuk ida iha nia rezidénsia ofisiál hodi buka konvense públiku atu simu oferta ne'e. Timoroan importante barak mak tama ba sorumutuk ne'e, sira membru besik ema nain rihun 2 hosi públiku. Bainhira Soares hahú ko'alia kona-ba 'autonomia boot liu', audiénsia hamnasa ba nia ko'alia, sira eziji referendu ba ukun-rasik an. La kleur, líder sira Konsellu Solidariedade Estudante sira Timor-Leste nian, ne'ebé mak foin harii, rejeita kedan konversasaun hotuhotu kona-ba autonomia, no eziji referendu ba ukun-rasik an ho supervizaun hosi UN.

Governu Howard fó hela ona kobertura diplomátika boot ba Indonesia nia oferta ba autonomia ho ko'alia kona-ba possibilidade atu iha referendu. Iha vizita ba Jakarta iha fulan jullu 1998, Alexander Downer rejeita pedidu ba referendu, hodi deklarata katak Timor-Leste 'ita hotu bele haree moos katak fatin ida fahe-malu maka'as. Lalika buka atu rezolve problema ne'e ho lais.' Ikus fali iha fulan ne'e duni, Downer viaja ba Filipinas ba konferénsia tinantinan entre Nasaun sira ASEAN nian ho sira-nia parseiru prinsipái sira. Nia deklarata-hikas nia governu nia rejeisaun ba pedidu ukun-rasik an: 'Ha'u la fiar katak hakat agora kedan ba buat ruma hanesan Timor-Leste nia ukun-rasik, mak solusaun ruma'.

Situasaun ekonómika iha Indonesia mout beibeik liután. Ajitasaun iha rai laran hahú ameasa atu sai hosi kontrolu. No ho buat sira ne'e hotu, ativismu internasionál ba Timor-Leste mosu hanesan problema ida ne'ebé prezidene Habibie la presiza liu. Iha 24 jullu 1998, nia fó-sai programa ba retira tropa sira, hahú ho militár kombatene nain rihun ida (1000). Habibie deklarata tan katak neineik-neineik tropa kombatente sira sei fó fatin ba tropa ne'ebé adekua liu ba halo projetu melloramentu sivil. Buat tebes maka, tropa sira la sai nein uitoan. Batallaun lima tun subarsubar iha kalan iha parte norte Lospalos nian. Ema lokál sira nota kedan sira-nia prezensa iha ne'ebá. Ativista sira iha Australia, ne'ebé mak iha kontaktu regulár ho Timor-Leste, buka bolu ema-nia atensaun ba buat bosok ida-ne'e, maibé governu nega sira nia reklamasau. Downer hahii tebes desizaun atu retira tropa sira, hodi dehan 'hakat iha diresau loloos'. Nia deklarata katak nia simu garantia dehan tuirmai tropa balu seluk sei husik tan Timor-Leste:

Ha'ú diskuti asuntu ne'e ho ministru negosius estranjeirus Alatas. Nia konfirma relatu hosi m'idia katak n'umeru tropa sei hamenus. Nia konfirma n'umeru besik rihun ida no dehan mai ha'ú katak ida-ne'e hanesan dah'uluk no seluk sei tuir tan.

Loron-ba-loron klaru liután ba ema hotu katak 'status quo' ne'e la bele ona sustenta, la bele ona hahii nafatin ba tempu oin. Iha outubru 1998, governadór fantoxe, Abilio Soares, buka atu satan netik situasaun ne'e hodi aviza funsionáriu p'ubliku sira katak sira sei tenke husu rezignasaun hosi servisu bainhira sira la apoia karik autonomia. Nia ultimatu halo funsionáriu p'ubliku sira sadik hasoru nia iha Díli, Liquiçá no Baucau, no Timoroan rihun-ba-rihun halo demonstrasaun hasoru, hodi apoia funsionáriu p'ubliku sira no eziji governadór rasik atu rezigna-an.

No mós iha outubro 1998, Dr Andrew McNaughtan, ativista ida, bazeadu iha Sydney, lori sai-subar hosi Timor-Leste, rejistu pesoál lubuk boot ida tropa sira indonesia nian. Dokumentu sira-ne'e hatudu momoos katak retirada no desmilitarizasaun ne'ebé mak sira alega, mesak falsu hotu. Downer buka minimiza asuntu ida-ne'e, hodi deklara katak nia 'buka hela atu verifika dokumentus hirak-ne'e nia autenticidade'. Maibé, ho hatudu rejistu pesoál sira-ne'e, no ho pormenór sira ne'ebé mak mai iha rejistu ne'e, hatudu momoos katak autoridade sira indonesia nian bosok de'it – kaer duni sira ho liman iha aktu ne'e. Dokumentus hirak-ne'e hetan publisidade maka'as, no halo presaan ba Habibie no ba Indonesia nia aparelu politika externa sira-nia leten, sa'e maka'as tebetebes. Iha novembru 1998, Timoroan rihun-ba-rihun mak relembra masakre Díli nian, sira halibur hamutuk iha semitériu Santa Cruz no eziji ukun-rasik an. Iha dezembru 1998, demonstrasaun boot halo Díli para, ho jovem sira pro-ukun-rasik an, halo barreira iha dalan sira no haruka funsionáriu p'ubliku fila ba uma.

Sira ne'ebé mak komprometidu ho 'status quo' tenke buka válvula eskape ida ne'ebé bele lori-sai tiha manas hosi sentimentu pro-ukun-rasik an sira ne'ebé sa'e lais maka'as derepenti de'it. Foin de'it iha semana balu ba kotuk, Downer selebra aniversáriu ba dala sanulu Matignon Accords, ne'ebé França asina ho eleitoradu sira Nova Kaledónia nian. Akordu sira ne'e, adia duni desizaun kona-ba Nova Kaledónia nia status finál liu dékada ida. Ne'eduni Howard hakerek ba Habibie iha loron 19 dezembru 1998, temi Matignon Accords, ne'ebé mak 'loke dalan ba kompromisu ida ba solusaun politika atu implementa bainhira adia lai referendu ida kona-ba status ikusliu ... ba tinan barak'. Nia sujere katak Indonesia, mós, bele adopta fórmula ida ba 'periodu substansiál ba autonomia' tui mai halo 'aktu autodeterminasaun ho

Timoroan sira iha tempu aban-bainrua ruma'. Ida-ne'e, Howard hakerek, sei bele fó tempu ba Indonesia atu prezenta problema 'iha maneira ida atu bele evita desizaun finál sedu liu'.

Ne'e liafuan bobar, bainhira dehan katak karta ida-ne'e mak evidénsia ba Howard nia apoiu ba autodeterminasaun. Kontráriu mak loos: Howard buka atu satan netik presau ba ukun-rasik an. Nia hakarak de'it sobu tiha kestaun ida-ne'e no adia autodeterminasaun ba dook to'o haluha tiha.

Departamentu Relasoens Estranjeiras no Komérsiu (DFAT iha sigle inglés) konfirma katak 'preferénsia ne'ebé governu deklara sei tau ba períodu naruk ida, hafoin bele foti desizaun ruma kona-ba Timor-Leste nia estatutu finál. Hafoin karta ne'e, liu tiha fulan balu, governu reafirma katak laiha mudansa ruma ba polítika:

Ho evidénsia hotuhotu ne'ebé mak iha, Primeiru-Ministru to'o iha konkluzau katak mak objetivu ne'e ekonómiku no estabilidade estratéjika karik, entaun Timor-Leste ida autónomu ho Indonesia, pelumenu ba tempu agora, mak opsaun di'ak liu.

Liu tiha tinan ida, vise-sekretáriu DFAT nian explika katak 'parte importante hosi aminia hanoin iha tempu ne'ebé Primeiru-Ministru haruka nia karta ida-ne'e, tempu ne'ebé Indonesia iha de'it ona oportunidade mesak ida no ikus liu ona, atu kaer nafatin Timor-Leste integradu iha Indonesia'. Howard nia karta, tanba ne'e, hanesan tentativa ida ba aproveita di'ak liu 'oportunidade ikusliu' ba Indonesia atu bele satan netik forsa sira ukun-rasik an nian. Governu mak hakarak duni ambíguu kona-ba saida nia deklara ho 'aktu ba autodeterminasaun hosi Timoroan sira iha tempu ruma aban-bainrua'. Nia refere ba mekanismu revizaun ida, ne'ebé la signifika loloos referendu, atu dehan karik aktu ruma hanesan konsulta superfisiál bele natón ona (suficiente ona). Governu mós ambíguu iha kestaun ida-ne'e kona-ba saida mak nia hakarak dehan loloos ho 'forma autonomía ruma aseitável molok autodeterminasaun'.

Importante liu maka, governu Howard la prezenta kestaun kona-ba Tratadu Timor Gap. Iha karik autonomia nia okos, nu'udar ezemplu, minarai nia lukru hosi Timor Gap sei ba loos nafatin Jakarta. Autonomía ida-ne'ebé la nakloke ba Timoroan sira atu hetan benefísiu hosi rikusoin iha Timor Gap, susar atu simu katak iha interese boot. Transmigrasaun hosi Indonesia sei suli nafatin ba Timor-Leste, maske populasau lokal sira kontesta. No mós,

autoridade sira Indonesia nian mak sei kaer nafatin kontrolu liuhosi sistema judisiál. Sei iha mós militár barabarak iha Kupang, Timor Osidental, nune'e amesa ho forsa bele mosu hodi hatauk Timoroan sira. Howard nia governu nia proposta autonomia sei bele hamate ezijénsia ba ukun-rasik an.

Karta ne'e nia kópia-eletrónika ida, transmiti hosi kabu ba embaixadór Australia iha Jakarta. Orijinál haruka tuir liuhosi mala diplomátika. Embaixadór lori kópia ne'e apresenta ba presidente Habibie, ne'ebé mak rejeita ho hirus. Parese nia la gosta kompara fali ho situaun koloniál ba Nova Kaledónia nian. Timor-Leste hakat ba beibeik situaun ida ingovernável. Iha nível internasionál hanoin klaru ona katak autonomia de'it sei lato'o.

Habibie nia hanoin, iha influénsia maka'as hosi nia belun ideolójiku besik liu, ministru ba kooperativas, Adi Sasono. Hanesan Habibie, Sasono mós hasai kursu enjeñeiru; hanesan mós Habibie, nia mós uluk sekretáriu-gerál ba ICMI (Association of Indonesian Muslim Intellectuals). Sasono tinan barak ona mak apoia referendu iha Timor-Leste, no nia informa hanoin ne'e dala barak ona ba Habibie. Ho motivu pragmátiku, mós, Sasono foti ona konkluzaun, Indonesia monu ba situaun ida ladi'ak liu, tanba invade Timór. Nia selu folin diplomátiku boot, no sei bele selu nafatin ba oin beibeik. Jersaun foinsa'e Timoroan sira, ne'ebé boot iha Indonesia nia tempu, ko'alia Bahasa, la ko'alia portugés, no laiha experiénsia ruma tempu portugés nian, sira kontra maka'as tebes atu hela nafatin ho Indonesia. Polítiku sira iha tempu pos-Suharo, ne'ebé mak la hola parte ba desizaun atu invade Timor-Leste, mak sei lori todan iha sira-nia kabaas hosi polítika ida-ne'ebé la'ós sira mak responsável, polítika ne'ebé sira uluk la konkorda, no hosi ne'ebé sira la hetan benefísiu ruma.

Konselleira seluk ida Habibie nian, Dewi Fortuna Anwar, nia mós kontra kaer nafatin Timor-Leste. Nia kritika ona iha públiku aneksasaun ne'e, no nia hirus hasoru pergunta sira ne'ebé mak hatoo ba nia iha sorumutuk internasionál sira no iha konferénsia imprensa, ne'ebé nia tenke defende polítika ida nia la apoia. Nia ikusmai hakat liután ba oin, balu dehan, nia ko'alia ho ABRI ho kudadu. Ginandjar Kartasmita, ministru koordinadór ba ekonomía, nia mós deklarara nia pontu-de-vista rasik katak di'ak liu husik Timor-Leste ezerse nia direitu ba autodeterminasaun.

Klaru katak, Habibie rasik laiha envolvimentu barak ho Timor-Leste; tanba nia karreira ho liu natureza teknokrátika la eziji nia atu investe kapitál polítiku ka emosionál ruma ba

defende Indonesia nia okupasaun territóriu ne'e. Habibie dezenvolve nafatin nia hanoin kona-ba kestaun ne'e, hodi husu ba nia asesór polítiku sira iha loron 16 janeiru 1999, 'tansá mak ita tenke kesi-an nafatin ho Timór? Nusá mak ita la husik tiha de'it sira, karik sira lakohi hela tan ho ita?'. Howard nia karta to'o liuhosi mala diplomátika iha loron tuirmai, maibé Habibie liu tiha ona pontu sentrál – hodi apresenta kestaun 'hosi dalan ida ne'ebé bele sees hosi desizaun sedu liu no ikusliu'. Nia tau nia hanoin hirak ne'e iha karta ne'e, hodi argumenta prosesu separasaun ida lais liu:

mak kestaun Timor-Leste sai karik todan ida ba emar Indonesia nia luta no imajem, no karik, hafoin liu tiha tinan 22, emar Timor-Leste nian la sente hamutuk ho emar Indonesia nian ... sei razoável no intelijente karik ... Timor-Leste bele sai ho onra hosi nasaun unitária República Indonesia ...

Nia haruka kópia ba ministru lima, ho husu atu 'favór ida analiza tok'. Habibie diskuti kestaun ne'e ho figura xavi balu, sira rua figura senior iha forsas armadas: Major-Jenerál (ret'd) Sintong Panjaitan, ne'ebé dispensadu tiha hosi nia komandu hafoin akontesimentu masakre 1991 iha Díli; no Tenete-Jenerál Feisal Tanjung, ministru koordenadór ba política no seguransa. Ideia referendu sira diskuti iha loron 25 janeiru, iha gabinete komité ba política no seguransa nia sorumutuk, no liu tiha loron rua, ba diskuti iha gabinete tomak nia halibur. Gabinete nia membru barak hanoin katak Indonesia sei manán iha referendu. Votu iha Timor-Leste ba partidu ukun-na'in, partidu Golkar, beibeik aas liu média nasionál iha eleisaun sira ne'ebé hala'o ona iha ne'e.

Panjaitan no Tanjung, sira rua hotu uluk membru ba ekipa militar ne'ebé mak ba halo manipulasaun ba votasaun, ho UN nia supervizaun, hala'o iha Papua Oeste iha 1969. Iha nia biografia autorizada, Feisal Tanjung deskreve nia papél iha operasaun sekreta durante 'Act of Free Choice' iha 1969 ne'e. Iha tempu ne'ebá, nia lidera soldadu 150 hosi forsa espeisial Indonesia nian iha operasaun ida hodi buka manán referendu ne'e. Nia dehan katak nia halo operasaun no nia papél subsubar hosi observadór sira UN nian ne'ebé sira sei la deskonfia referendu ne'e la la'o ho justu.

Biar ba Timor-Leste nia prosesu votasaun ho qualidade oin-seluk – nia la'o ho kontrolu maka'as liu hosi UN no adultu sira livre hotu, la'ós de'it representante sira hosi grupu selesionadu ruma – Tanjung asumi tiha katak militar nia kbiit iha sosiedade nia leet natón ona

ba garante vitória Indonesia nian. Ierarkía militar mós monu daudaun ba karaterística típika hosi rejime autoritáriu sira – sira ladún fó valór ba emar nia vontade laek. Iha nia biografía, Feisal Tanjung dehan katak fofoun militar sira sura ona katak hosi Timoroan tomak, sira 75% nune'e mak sei hili integrasaun. Nia ho nia kolega ofisiál sira interpreta katak tanba 80% hosi eleitoradu Timoroan foin partisipa iha eleisaun Indonesia nian iha loron 7 juñu 1999, ne'e hanesan konfirmasaun ida ba sira-nia sura: 'Ida-ne'e indikasaun forti ida katak Timoroan sira maioria hamutuk hosi Indonesia nia sorin'.

Faktu maka eleisaun fulan juñu nian iha Timor-Leste, sira halo falsifikasaun boot; autoridade lokal sira okupadu liu ho prepara votasaun ba autonomia/ukun-rasik an bele la'ó didi'ak, Timoroan barak la preokupa ba rejistu atu bele vota iha eleisaun hirak-ne'e. Nune'e ladún importa katak Indonesia nia partidu ukun-na'in, Golkar, manán ho 49,1% votasaun iha Timor-Leste kompara ho 34,9 % PDI-P Megawati Sukarnoputri nian iha opozisaun. Biar ba, ho Golkar nia manán iha Timor-Leste – maske ida-ne'e, nia lakon iha fatin sira seluk iha Indonesia laran (exsetu iha Sulawesi Sul, ne'ebé nia hetan boot liu duké iha Timor-Leste) – autoridade Indonesia sira foti nu'udar indikasaun katak referendu sei lori rezultadu favorável ba sira. Liu tiha tempu kleur, ministru negósius estranjeirus Ali Alatas mai dehan katak sira maioria hosi membru sira gabinete nian 'konvensidu tebetebes katak ami sei manán referendu ne'e. Buat hotuhotu pinta ho otimismo.' Nia dehan: 'to'ó iha loron votasaun, relatu sira ne'ebé ami simu hosi ami-nia ema sira, hosi ema pro-integrasaun, Lopes da Cruz mós tama hotu no seluk tan, hatete katak ami mak sei manán.'

Ema alega beibeik katak desizaun atu halo votasaun maihosi Habibie nia gabinete kontra militar sira-nia hakarak, sira ne'ebé kontra maka'as ba halo votasaun ruma ba hili ukun-rasik an. Imajem loloos la'ós definidu didi'ak hanesane'e duni. Maske elite Indonesia sira iha opiniaun kuidadozu uitoan ba forsa demokrátika sira ne'ebé foin mosu iha tempu pos-Suharto, iha tempu ne'ebá sira hotu fiar katak pro-ukun-rasik an sei lakon iha votasaun.

Dokumentu internu ida Indonesia nian, ida ne'ebé mosu ikusmai iha 1999, mai klarifika liután ida-ne'e. Hakerek hosi ministru kordenadór asistente ba asuntos internus, Majo-Jenerál Garnadi, dokumentu ne'e deklarata katak governu Indonesia fiar nia mantéin asendénsia iha 1999 nia hahú, tempu ne'ebé sira konkorda ho votasaun. Garnadi nota katak governu fofoun otimista tebetebes katak 'ema sei hili mak autonomia'.

Ezemplu seluk ida ba Indonesia nia hanoin iha tempu ne'ebá mai hosi ofisiál militár indonesiu iha komandu operasionál ba kampaña ho hahalok foer sira, Major-Jenerál Zacky Anwar, ne'ebé ikusmai dehan: 'iha ami-nia previzaun, ami bele manán no bele mós lakon ho marjem kiik. [...] Maibé 21% de'it vota ba Indonesia atu ukun nafatin Timor-Leste. [...] ida-ne'e desapontamentu ida duni mai ami'.

Polítika foun ne'e ministru estranjeirus Ali Alatas no ministru informasaun Yunus Yosfiah maka fó-sai ba públiku iha loron 27 janeiru 1999. Kontráriu ho Howard nia sujestaun ba autonomía iha períodu naruk ruma nia laran 'molak foti desizaun ba Timor-Leste nia status finál'.

Nune'e governu Indonesia no Australia sira-nia polítika ba mantéin nafatin 'status quo' remata. Governu Indonesia obrigadu halo mudansa ba nia polítika tanba situaun halai lais aat ba beibeik, no tanba mós hetan presau beibeik mai hosi nivel kraik. Governu Australia halo buat hotu ne'ebé nia bele, hodi apoia governu Indonesiu okupa nafatin Timor-Leste. Iha tempu ikus liu, nia labele ona satan presau mai hosi nivel kraik, no nia obrigadu la'o hasoru prosesu foun ida-ne'ebé uluk nia hanoin katak imposível atu mosu.

Ho haka'as-an hodi buka garante vitória ba proposta autonomia, autoridade sira Indonesia nian hahú hamoris estratéjia ida ne'ebé buka taka dalan ba ukun-rasik an. Estratéjia ida-ne'e iha komponente rua: ida polítika no ida militár: atu satan netik ka taka dalan ba envolvimentu internasionál, no halo operasaun maka'as liután liuhosi disfarse ho forsa 'proxy', koñesidu nu'udar 'milísia'. Komponente rua ne'e hotu depende ba fiksaun ne'ebé deklarata katak milísia, forsa ida independente, la'ós buat ruma militár sira mak harii. Atu bele asegura 'negasaun plauzível', mlitár sira mós buka hatudu katak sira la'ós fonte prinsipál ba represaun no violénsia maibé forsa ba pasifika 'grupu sira luta hasoru malu' iha Timor-Leste.

Atu estratéjia ne'e bele la'o dí'ak, militár indonesiu presiza hetan aliadu (sala-maluk) estranjeiru ruma atu fó kobertura diplomátika ba sira iha arena internasionál. Aliadu nune'e sei tatoli propaganda iha rai-li'ur katak emar Timoroan sira la hamutuk ba kestaun ukun-rasik an, maibé sira fahe malu entre partidu oinoin, ataka malu maka'as, ne'eduni militár sira iha ne'ebá atu garante funu sivíl labele mosu. Uza forsa para-mlitár sira importante tebes ba ne'e, maibé problema maka observadór hotuhotu hatene tia ona katak militár sira maka rekruta, fahe-kilat, treina, no organiza milisia sira.

Atu di'ak liu, karik aliadu rai-li'ur sei bele aumenta estratéjia nia komponente militár hodi konkorda ho afirmasaun katak sosiedade timorensé fahe malu kona-ba ukun-rasik an. Hoddi dehan katak militár indonesiu sira árbitru neutru ida, represaun no violénsia la'ós mai hosi sira, no ida-ne'e serve ba hamenus possibilidade ba intervensaun internasionál hodi bele garante proposta ba autonomía atu manán.

Governu Howard serve loloos papél atu sai aliadu rai-li'ur di'ak liu, no haree ninia hahalok lori ita ba konkluzaun, la'ós buat ruma di'ak, maibé laiha dalan seluk, katak nia fó duni rekizitu kobertura diplomátika. Iha faze hotuhotu, governu Howard nia diplomasia la'o tutan-malu ho estratéjia negasaun plauzível, no funsiona duni hodi hamenus possibilidade atu intervensaun hosi rai-li'ur bele tama.

Maibé, governu tenke muda estratéjia tanba simu presaan maka'as hosi públiku ho laran-hirus. Tempu ba votasaun la'o ho hadau-malu entre diplomasia governu nian hosi sorin ida, no hosi sorin seluk, movimentu solidariedade ida forti liu no nakonu ho kbiit foun ne'ebé mak halo kampaña iha Australia no iha rai-li'ur, no opozisaun hosi parlamentu ne'ebé halo governu Howard nian, tau ain ba kotuk. Governu mós neon-susar maka'as ho materiál klasifikadu ne'ebé sai ba públiku beibeik no tutuir-malu hadau-malu ba 'buat rua hotu, detalles no kauzas'.

Tuir akadémiku espesialista kona-ba Indonesia, to'o iha período Ordem Foun [Suharto] nian remata, governu Indonesia, bele dehan, besik rejeita iha mundu tomak reivindikasaun espesífiku kona-ba abuzu direitus umanus, maske iha ona tempu ne'e atu remata, liuliu ho presaan hosi komunidadé internasionál, nia hahú duni rekoñese katak problema iha duni. Maibé kona-ba reklamasaaun espesífiku idaidak, nia kontesta buat rua hotu, abuzu sira-ne'e nia kauza no detaille.

Ho rejime Ordem Foun monu, no ho presaan hosi Timoroan sira ne'ebé hakarak ukun-rasik an aumenta, labele ona evita katak, hosi komunidadé rai-li'ur, sira sei fihir ba Timor-Leste ho matan-moris liután. Governu Howard, ho nia papél nu'udar aliadu rai-li'ur kredível no konfiável, buka hamenus presaan ba intervensaun hosi rai-li'ur. Nia hatuur argumentu haat hodi buka defende militár indonesiu sira-nia hahalok aat iha Timor-Leste:

- Nega hahalok aat, no deklara katak faktu sira ladún klaru.

- Bainhira mosu karik prova ruma ba hahalok aat, deklarata katak violénsia mosu hosi parte rua hotu.
- Bainhira klaru katak militár indonesiu sira de'it mak envolve iha violénsia, deklarata katak sira, 'elementu desonestu' balu, mak halo.
- Deklarata beibeik katak militár sira iha ne'ebá atu 'mantéin de'it, faksau sira ne'ebé halo konflitu, dook malu'.

Resposta ofisiál sira Australia nian la'o liga-malu ho Indonesia nia esratéjia atu nega abuzu direitus umanus no sira envolve iha funu tuir sira-nia haruka. Ofisiál Australianu sira fofoun rejaita reklamasau katak militár Indonesia sira maka responsavel ba abuzu direitus umanus; bainhira sira labele ona kaer ba argumentu ida-ne'e sira 'kestiona buat rua hotu, detalles no kauza hosi abuzu sira ne'e'.

Ohinloron ita rekoñese ona masakre iha Alas iha novembru 1998 katak iha-ne'e mak hahú milisia nia kampaña terror hafoin Suharto monu. Ema dehan katak besik ema 50 mak mate, no sira harahun ema nia uma ho sasán hanesan vingansa hasoru atake hosi funu-na'in rezisténsia nian. Bainhira relatu kona-ba masakre ne'e sai iha públiku, Australia nia Departamentu Relasoens Externas no Komérsiu informa katak ema nain sia de'it mak mate, no hosi sira-ne'e tolu soldadu indonesiu. Informasaun hirak ne'e bazeia ba vizita ida hosi adidu militár Australia nian, no Alexander Downer apresenta hanesan inkéritu signifikativu ne'ebé mai klarifika kestaun sira kona-ba abuzu direitus umanus. DFAT nia alegasaun ida-ne'e mai hamenus preokupasaun kona-ba militár indonesiu sira-nia hahalok aat hasoru ema sivíl sira. Ikusmai, klaru liután katak DFAT nia avaliasaun mai halo de'it kobertura diplomátika ba militár indonesiu sira.

Sees dook hosi inkéritu ruma, adidu militár nia vizita hanesan de'it viajem rotina ida, atu ba apresenta de'it kontaktu militár sira iha área ne'ebá ba ema ne'ebé atu mai tuur iha nia fatin (susesór). Adidu ne'e ba vizita Alas iha oras balu nia laran de'it, no militár indonesiu sira tutuir nia iha tempu tomak, ho hamtauk testemuñu ruma bele iha ne'ebá karik. Tempu tuirmai, bainhira adidu ne'e tuur hela iha hotel ida iha Díli hemu bebida ida, ema besik ba nia hodi informa katak estudante Timoroan sira tuur iha meza sorin bele fó tan informasaun seluk. Nia hili lakohi ko'alia ho sira, dehan nia 'hanoin la'ós apropiadu'. Laiha sirkunstánsia ruma mak bele dehan DFAT nia avaliasaun bele konsidera nu'udar tentativa ho laran-moos atu

hatudu lialoos; to'o ohinloron vizita hanesan investigasaun ba direitus umanus, hanesan Downer halo, atu hamenus de'it presau hosi militár Indonesia nia leten.

Iha loron 5 dezembru 1998, 'news wires' lori reportajem kona-ba xefe militár Indonesia nian iha Díli, Koronel Tono Suratman, fó-hatene liuhosi anúnsiu katak nia iha intensaun atu fahe kilat ba ema sivíl sira hodi bele kombat rebelde pro-ukun-rasik an sira. Suratman dehan katak nia sei ekipa voluntáriu sira ho kilat 'atu bele proteje aldeia sira ne'ebé mak bele hetan atake hosi rebelde sira'. Hafoin reportajem ida-ne'e mosu, East Timor International Support Centre alerta katak planu ida-ne'e la'ós atu buka proteje aldeia sira, maibé atu hatauk sira: 'Forsa ba defeza populár' hanesan de'it deskulpa ho laran-aat ida ba harii tan grupu paramilitár ida iha Timor-Leste. Forsa defeza ida-ne'e, sira [militár indonesia nian sira] sei uza ba halo sira-nia servisu foer, no tan sira lahatais farda, sei laiha rsponsabilidade ruma monu ba sira-nia leten karik sira komete krime ruma.

Iha Current Intelligence Breaf ida iha loron 6 janeiru 1999, Australia nia Defence Intelligence Organisation (DIO) relata asasinatu sira da'uluk milisia pro-integrasionista komete, nota katak ABRI (Angkatan Bersenjanat Republik Indonesia, ka Forsas Armadas Repúblika Indonesia nian) mak iha kotuk:

ABRI nia desizaun ba fahe-kilat ba milisia sira hamosu ona ema fakar ran da'uluk. Bainhira ABRI fó nafatin sira-nia rsponsabilidade seguransa ba seluk, sei bele iha tan konfrontu ... ABRI rekoñese katak uza forsa hasoru grupu sira pro-ukun-rasik an nian sei atrai nafatin kritika hosi rai-li'ur. Ne'eduni ho uza forsa hasoru movimentu referendu nian parese sei tatoli nafatin ba ema seluk.

Maibé, iha tempu ida-ne'e laiha informasaun ruma mak halai-subar hosi odamatan-kotuk ba li'ur. Governu nia liafuan sira ne'ebé mak fo-sai ba li'ur, tuir militár indonesiu sira-nia kampaña desinfirmasaun, fiar metin loos katak sira bele taka ba públiku ida ne'ebé preokupa maka'as beibeik liután atu hatene buat bosok hirak-ne'e. Iha entrevista ida ba radiu BBC iha loron 5 fevereiru 1999, Downer dehan katak governu labele konfirma relatu sira ne'ebé dehan katak militár indonesiu sira fahe kilat ba milisia sira iha Timor-Leste: 'Militár indonesiu sira nega daudauk buat sira ne'e ... loos duni, katak susar tebes mai ita atu verifika hosi dalan ida ka seluk.' Ho ko'alia nune'e, klaru katak, ministru estranjeirus ne'e 'kestiona detaille no kauza sira'.

Haree ba Koronél Suratman nia deklarasaun, ezijénsia sira hosi East Timor International Support Centre no avizu sira iha DIO nia Current Intelligence Brief, deklarasaun sira Downer nian – la sura nia intensaun – buat sira-ne’e mak fó kobertura diplomátika ba militár indonesiu sira-nia atividade.

Iha loron 9 febreiru 1999, loron haat de’it hafoin Downer dehan katak ‘ita hotu bele haree katak susar tebes mai ita atu ba verifika hosi sorin ida ka seluk’, Australia nia Defence Signals Directorate (DSD) intersepta mensajem ne’ebé mai konfirma katak Indonesia nia unidade forsa espesial rua, ho naran kódigo Tribuana no Venus, to’o iha Timor-Leste tama hamutuk ba operasaun sekreta. Liu tiha loron lima, DSD intersepta xamada telefonika ida hosi kabesilla milisia nian ida ba unidade Tribuana. Xamada ida-ne’e hodi ko’alia kona-ba grupu milisia mahidi (Mati Hidup Demi Integrasi, ka Mate ka Moris, Integrasaun) nia elementu ne’ebé kanek nia kondisaun. Tuir sira-ne’ebé intersepta mensajem ne’e, unidade forsa espesial informa ba kontaktu milisia ne’e katak ‘Brigadeiru-Jenerál Simbolon laran-susar tebes, rona nia elementu ida kanek’. Referénsia ida-ne’e ba Brigadeiru-Jenerál Mahidin Simbolon, Komandante-Adjuntu ba área komandu militár responsável ba Timor-Leste.

Akrónimu mahidi hanesan omenajem ida ba Mahidin Simbolon, peritu iha operasaun sekreta ne’ebé maka uluk partisipa mós iha invazaun ba Timor-Leste iha tinan 1975 no hosi tempu ne’e nia serve turnu servisu pelumenus dala neen iha ne’ebá. Simbolon mak lidera operasaun ne’ebé kaptura Xanana Gusmao iha tinan 1992. Nia, figura prinsipal ida iha nível operasionál ba estratéjia funu sekretu militár Indonesia nian iha tinan 1999. Implikasaun klaru hosi transkrisaun hirak ne’e, no seluk hanesan, signifika milisia sira iha TNI sira-nia kotuk, la’ós forsa independente ruma formadu hosi ema rai laran nian. Klaru katak TNI kontinua nafatin sira-nia kriaun nia kampaña hosoru Timoroan sira. No mós, relatu no avizu mai hosi ativista sira, hotuhotu loloos, no governu Australia hatene nanis katak sira loloos.

Maibé governu Howard nia polítika ba ‘kontesta buat rua hotu, detaille no kauza’ la’o nafatin. Iha konferénsia imprensa ida hafoin hasoru-malu ho governu Indonesia iha loron 25 febreiru 1999, jornalista ida husu ba ministru exteriores Australia nian: Ita presiona Indonesiu sira kona-ba kestaun desarmamentu no nune’e karik, saida mak sira hatán?

Downer hatán:

Loos, ha'u halo ho Ali Alatas [Ministru Estranjeirus Indonesia nian]. Ha'u dehan klaru ba nia katak ami simu relatu balu dehan katak Indonesiu sira fahe kilat, no ami neon-lametin ho buat ida-ne'e. Ida-ne'e sei la mai hadi'ak ambiente. Klaru katak sei la hadi'ak. No nia explika mai ha'u katak sira la fahe kilat ba pro-integrasionista sira. Maibe buat ne'ebé sira halo maka buat ne'ebé sira halo iha provinsia hotuhotu, ka kuaze provinsia hotu. Ha'u hanoin nia atu dehan provinsia hotuhotu Indonesia nian, no buat ne'ebé iha, maka sira iha ema sivil balu ne'ebé tulun halo polisiamentu.

Laiha informasaun ruma halai-subar hosi kotuk iha etapa ida-ne'e, no governu halo deklarasaun sira ho brani liutan. Sira-nia liafuan sira ajusta di'ak loos ba governu Indonesiu rasik nia retorika, no halo-tuir asuntu momoos. Ulukliu, faktu sira ne'ebé mak hakesuk-malu: 'mak buat ne'e hanesane'e duni karik/bele iha/susar atu dehan, konserteza'. Da'ruak, Indonesiu sira fó ona garantia: 'governu Indonesia nian garante mai ami la'ós sira-nia politika/ita konserteza la'ós dehan sira-nia politika mak ida-ne'e'. Da'toluk, buat sira ne'e bele 'elementu desonestu balu'. Asuntu hotuhotu Downer hatudu hotu iha nia hahalok iha entrevista ida halo iha fulan marsu 1999:

Mak ida-ne'e mosu dunik karik, no iha preokupasaun karik, ida-ne'e bele mosu daudaun, mak ida-ne'e mosu duni karik, konserteza la'ós politika ofisial governu Indonesia nian, konserteza la'ós buat ne'ebé mak ho Jenerál Wiranto, xefe forsas armadas, nia hatene/simu. Maibe bele elementu desonestu balu iha forsas armadas nia leet ne'ebé mak fahe kilat oin-ruma ba pro-integrasionista sira ne'ebé luta, ita hatene, ba Indonesia nia kauza ... Governu Indonesia, bainhira ami foti kestaun ne'e ho sira, hanesan mós bainhira ami foti ho Ali Alatas iha loron seluk ida, sira dehan konserteza buat ida-ne'e la akontese ida, katak sira la fahe kilat ba paramilitár sira, fahe mak ba sira grupu informál ba apoia polisia, sira-ne'e ema sivil iha Timor-Leste miabé buat ida-ne'e ami halo iha provinsia hotuhotu Indonesia nian. Laiha buat ruma oin-seluk no ami halo ne'e baibain ona, ne'eduni ha'u atu dehan, ha'u simu duni Governu Indonesia nia liafuan kona-ba ne'e, katak ida-ne'e la'ós politika ofisial Indonesia nian, maibe hosi sorin seluk keta soldadu indonesiu balu halo ho dalam laformál karik.

Maske iha relatu barak – públiku no privadu – dehan kontráriu (oin-seluk), Downer afirma nafatin katak militár Indonesiu sira la fahe kilat ba grupu seluk atu halo funu:

Dí'ak, ha'u hatete lai liafuan ruma kona-ba buat fahe kilat ba paramilitár sira ne'e ... Indonesia nia Ministru Exteriores Ali Alatas ... dehan mai ha'u katak forsas armadas Indonesia nian la fahe kilat ba paramilitár sira. Maske ita bele konkorda katak ida-ne'e la'ós ABRI ka Governu Indonesia nia politika ofisiál, risku iha atu elementu desonestu balu iha ABRI laran bele fahe ona ka fahe daudaun hela ona kilat ba sira-ne'ebé hanaran paramilitár iha Timor-Leste.

Loron neen liu tiha deklarasaun ida-ne'e, masakre Liquiçá akontese. Oinsá masakre ne'e mosu, la'ós buat ruma helik-an: iha loron 6 abril 1999, milisia balu, akompañia ho militár no polísia, sira ba vila Liquiçá.

Sira haleu tiha uma-kreda ida-ne'ebé ema balu hamahan an iha ne'ebá, sira dada sai padre nain rua hosi fatin abrigu ne'e, no lori sira ba kuartel militár distritu nian. Bainhira padre sira laiha ona ne'ebá, tropa indonesiu sira so'e granada-gas ba uma-kreda laran. Bainhira refujiadu sira halai-sai hosi uma-kreda, la haree buat ida no halai buka salva sira-nia moris, milisia sira halai hasoru sira. Sira ataka feto no labarik sira ho tuku, baku, ai, fatuk, kilat, dima no katana. Liu ema lima-nulu mak mate no sira nain hitu kanek ho atake ne'e. Liu tiha, milisia sira obriga ema sira iha-ne'ebá hasa'e bandeira Indonesia.

Governu Howard tama ba kondisaun "kontrola-estragus". Halo komentáriu ba masakre, Downer ko'alia tuir de'it tema sira estabesidu ona:

Dí'ak, haree lai, sira [militár sira] iha hela ne'ebá, ha'u komprende, iha insidente ne'e maibé dala ida tan, diskuti hela daudaun kona-ba sá parte mak sira halo. Klaru katak sira la oho ema ida, maibé mosu argumentu ida, kona-ba sira buka hapara ema sira-ne'e ka sira la haka'as an atu hapara, no problema ne'e susar tebes tanba ita rasik la haree ho matan iha ne'ebá, atu bele prova problema ne'e loloos haliis ba sorin ne'ebé. Militár sira konta istória ida. Seluk konta istória seluk ida. Seluk fali konta tan istória seluk ida. Ne'eduni ami-nia relatóriu mak imi simu relatóriu kontraditóriu, relatu oin-seluk tebetebes ho buat ne'ebé mak mosu, maibé buat ne'ebé ita bele iha

serteza maka ema balu mate duni, ema balu kanek duni no insidente ida infeliz no violentu tebetebes no ami hein katak insidente hanesan ne'e sei labele mosu tan.

Nia ikusmai rekuza atu fó-sai ba públiku relatóriu ba masakre ne'e preparadu hosi diplomata Australianu sira.

Hafoin masakre Liquiçá, liu tiha loron sanulu resin-ida, grupu milisia iha Díli ataka apoiante ukun-rasik an balu koñesidu nia uma, no jornál lokál nia eskritóriu. Manuelito Carascalão, foinsa'e familia Timoroan koñesidu ida nia oan, ema oho, hamutuk ho pelumenus ema nain sanulu resin-rua – bele ruanulu resin-lima – seluk. Jornál "Tabloide" sira iha Australia hatudu fotografia labarik-mane foinsa'e ne'e nian, no halo públiku sira iha Australia hahú hatudu sira-nia hirus ba masakre em masa ida-ne'e. Nune'e, Alexander Downer fó-sai apelu públiku ida ba militar sira, agora ho naran TNI (Tentara Nasional Indonesia – Forsas Armadas Indonesia nian) atu mantéin nafatin seguransa no hasai tiha kilat hosi milisia sira-nia liman.

Howard dere telefone ba Habibie hodi hato'o ninia laran-susar, no sira nain rua konkorda atu hasoru-malu iha Bali hodi ko'alia kona-ba situaun ida-ne'e.

Hafoin sorumutuk ida-ne'e, ne'ebé presidente Habibie ba ho pesoál militar senior Indonesia nian, governu Howard kaer-hikas nia programa ba fó kobertura diplomátika. Downer ho laran-luak loos, hahii autoridade Indonesiu sira, dehan katak laiha dúvida ruma katak Indonesiu sira liuhosi prosesu ida-ne'e, sira komprometidu atu rai tiha kilat ... ita laiha nein razaun ida atu duvida ba sira-nia vontade di'ak'. Howard ko'alia kona-ba kompromisu maka'as ne'ebé mak governu Indonesiu halo ba hala'o votasaun ida moos no nakloke ... ha'u laiha razaun ruma atu duvida kompromisu ho laran-moos ne'ebé mak sira rua hotu, Prezidente no ministru sira seluk iha mós oin, horseik halo ... laran-metin ne'ebé mak ha'u hato'o ba sira, laran-metin ida katak, ba oin buat hotuhotu sei di'ak liu semana kotuk nian.

Satan netik presauñ internasionál.

Elementu xavi ida, iha governu Indonesiu no Australianu nia estratéjia maka prevensaun ka hakiik envolvimentu internasionál. Australia nia pezu diplomátiku tomak tau

hotu ba buka estratéjia ida-ne'e. Iha loron 22 febreiru 1999, DFAT nia sekretáriu, Ashton Calvet, hasoru-malu ho sekretáriu-estadu US nian, Stanley Roth iha Washington.

Tuir transkrisaun hosi konversasaun sensível boot ne'e, Roth iha opiniaun katak operasaun manutensaun paz ho eskala boot mak sei aspetu ida inevitável ba tranzisaun. Lahó ida-ne'e, Timor-Leste bele monu namtate ... [Roth] ... laharee possibilidade ba rekonsiliaun ruma entre grupu Timoroan sira ne'ebé mak bele evita nesesidade intervensaun significativu hosi rai-li'ur ... [no] ... sujere katak Australia nia pozisaun atu mantéin forsa manutensaun ba paz hosi dook de'it, mak pozisaun ida derrotista liu, no katak prezisa la'ó ba oin no buka konvense Kongressu no estadu-membru sira UN nian katak ida-ne'e tenke halo duni. Roth argumenta katak, kuandu laiha forsa manutensaun paz internasionál, territóriu sei tama ba violénsia. Maibé Calvert, deklara governu Australia nia pozisaun, tau momoos katak Australia sei la apoia forsa manutensaun paz, no hala'ó nafatin liña 'faksoens':

Tema sentráal ida atu bele lori ita to'o iha rezolusaun ruma maka konvense Timoroan sira katak sira mak tenke kaer/halo rasik, no halakon tiha hanoin katak UN sei rezolve sira-nia problema hotu bainhira sira, sei fadigadu nafatin ba vinga-malu no halo ran-fakar.

Roth deskreve governu Australia nia pozisaun nu'udar 'derrotista' no salienta importánsia ba harii koligasaun internasionál ida atu bele konvense UN no Kongresu US nian katak tenke harii duni forsa manutensaun paz.

Ninia esforsu tomak, Clavet ne'ebé mak determinadu hakarak satan netik forsa manutensaun paz ruma, rejeita hotu. Bainhira transkrisaun sorumutuk Calvet-Roth nian lekar subsubar ba mídia liu tiha fulan balu, mak governu foin hakfodak no ema foin toman sira-nia falta. Fofoun nia sei mai ho liufuan, sidi tun-sa'e, tuirmai buka atu minimiza sorumutuk ne'e nia significánsia hodi deklara katak Roth hatete de'it nia hanoin rasik. Maibé, observadór atentu sira komprende momoos ona sorumutuk ne'e nia significánsia. Roth iha tempu ne'ebá nia mak US nia burokrata rejionál influente liu. Nia iha tempu ne'e ba hasoru-malu ho Australia nia burokrata senior liu politika externa nian. La'ós halibur-malu sosiál ruma no nia la'ós expresa ninia hanoin pesoál kona-ba (nu'udar ezemplu) oinsá hadi'ak nia balansu ba baku bola golfe. Nia ba iha ne'ebá atu diskuti possibilidade prezensa forsa manutensaun paz tanba perigu sira iha Timor-Lste.

Maske resposta ofisiál hosi Australia atu halakon tiha perspetiva ne'e no kaer nafatin fiksaun katak problema prinsipál mak atu 'konvense Timoroan sira katak sira mak tenke halo rasik', la'ós ho kampaña terror militár indonesiu sira-nian. Mak governu kompromete maka'as ho prezensa forsa manutensaun paz karik, nia sei haksoit liuhosi oportunidade ne'e, la'ós rejeita.

Bainhira rekuza, governu hatudu nia kompromisu momoos hakarak tuir nafatin ninia objetivu, ne'ebé buka atu minimiza envolvimentu internasionál no fó liberdade da Indonesia iha Timor-Leste. Mak transkrisaun hosi sorumutuk Calvet-Roth la sai-subar ba públiku karik, públiku Australianu sei la hatene buat ruma kona-ba governu nia rekuza sekreta ba proposta Roth nian to'o 2029, kuandu arkivu sira bele loke ona tuir regra tinan-tolu-nulu nian. Hosi sorin seluk, ho transkrisaun sai-subar iha tempu-real mak halo presan polítika bele sa'e maka'as kedas.

Iha tempu ne'ebá governu nia polítika hasoru obstákulu boot tolu iha Australia: ativista sira-ne'ebé apoia Timor-Leste; portavoz Trballista nian, Laurie Brereton; no públiku Australia nia matan loke boot liu beibeik tan. Governu Indonesiu haka'as an servisu oras extras hodi buka satan netik eskrutíniu internasionál. Nia hakfodak tebetebes iha 1997 nia remata, bainhira Brereton muda polítika Partidu Trballista Australia nia, aviza iha karta ida katak mudansa sei 'tau momoos ita-nia país rua iha rota kolizaun'. Brereton responde ho reafirma ninia kompromisu ba mudansa polítika, ho dehan 'apropriadu totál, realista no defensável'.

Iha fulan fevereiru 1999, Indonesia hasa'e maka'as tan nia liña-dura nia pozisaun, hodi kansela Brereton nia vizita ba Timor-Leste. Nia hakarak hatudu momoos nia dezapontamentu ho Brereton husu autodeterminasaun no prezensa monitorizasaun internasionál. Hosi nia rekuza atu husik grupu parlamentár Uniaun Europa nian tama ba vizita Timor-Leste, klaru katak governu Indonesiu hakarak halo interese internasionál lakon brani iha tempu ne'ebé Timoroan sira sadik liután sira.

Autoridade Indonesiu sira neon-loke ona katak presiza represaun maka'as liután atu populasaun bele hakru'uk ba sira, no observadór internasinál sira sei komplika sasán. Ko'alia kona-ba 'hahalok latuir regra hosi elementu pro-ukun-rasik an sira iha Timor-Leste', embaixadór Indonesia nian rekuza entrada 'to'o loron ruma iha tempu konveiente liu.'

Referénsia ba 'elementu pro-ukun-rasik an sira iha Timor-Leste' boot tebes. Indonesia justifika nia okupasaun ho kaer ba fiksaun – poténsia koloniál sira baibain halo nune'e – katak populasaun fahe-malu ba grupu rival, elementu balu hakarak 'referendu' no seluk 'anti-referendu', no katak militar sira tenke iha ne'ebá hodi mantéin ordem no prevene violénsia entre elementu sira ne'e. Buat loos maka, violénsia no represaun maihosi militar sira, no sosiedade timorensé unidus tebetebes kona-ba kestaun ukun-rasik an. Maibé governu Australia nia pozisaun, dala ida tan, la'ó hamutuk ho governu Indonesiu nia pozisaun. Downer mosu iha TV hodi rejeita ezijénsia atu bolu forsa manutensaun paz, hodi deklarara katak buat saida mak prezisa duni maka 'rekonsiliaun entre grupu sira Timor-Leste nian.' Forsa manutensaun paz sei kontra-produtivu, nia defende, tanba sei bele kria impresaun katak esforsu ba buka rekonsiliaun sei la funsiona.

Iha loron 5 maiu 1999, mak loron ne'ebé asina akordu iha Sede Nasoens Unidas nian iha Nova lorke. Akordu 5 maiu ne'e, hanesan tuirmai ema hotu koñese liu, mak prevee atu hato'ó proposta autonomía ba Timoroan sira. Mak sira simu karik proposta ida-ne'e, kestaun Timor-Leste sei konsidera rezolvidu loloos ona, no lia sei laiha tan. Mak sira rejeita karik, sei transfere autoridade ba UN, hodi Timor-Leste hahú la'ó dalan ba unkun-rasik an. Indonesia mak sei kaer responsabilidade tomak atu mantéin seguransa. Loron rua liu tiha, Forssa Defeza Australia nian hahú halo planu ba apoiu lojístiku ba votasaun. Ida-ne'e koñesidu nu'udar Operation Concord. La'ó hamutuk iha operasaun ida-ne'e nia sorin, hahú mós planu ba Operation Faber, ne'ebé mak envolve observadór militar sira ne'ebé atu ba servisu ho United Assistance Mission in Timor-Leste (UNAMET).

Maske nune'e, planifikadór sira, Defeza nian, hahú prepara mós planu seluk ida – Operation Spitfire. Iha tempu ne'ebé Indonesia kaer metin ona kontrolu ba 'seguransa', nia iha ona pozisaun atu hamonu apoiante sira pro-ukun-rasik an ho votasaun nia rezultadu oinsá de'it.

Indonesiu sira hanoin katak sira mak sei manán iha votasaun. Biar nune'e, mak la'ós sira mak manán karik, sira prezisa halo buat hotu ho lais atu bele muda tiha rezultadu. Tuir situasaun hanesane'e mak, observadór internasionál sira sei satan netik saida de'it mak Indonesiu sira koko atu muda. Tenke hasai tiha sira hosi territóriu, hanesan uluk halo tiha ona

iha Indonesia nia invazaun uluk iha 1975. Planu ba Operation Spitfire hahú iha loron 11 maiu 1999. Iha planu hanoin atu evakua ema, la'ós atu maintéin paz.

Iha Australia ne'ebá, Downer deklarara nafatin katak problema sentrál la'ós terror hosi militár Indonesiu sira maibé diferenza entre 'grupu' sira, no katak habrani 'grupu' hirak ne'e atu 'sira halo rasik, mak xavi ba rezolve problema:

Di'ak, problema iha Timor-Leste maka tensaun entre pro-integrasionista sira, atu dehan ema sira ne'ebé mak fó apoiu atu hela nafatin ho Indonesia, no Timoroan sira seluk. No ita akonsella ho ita-nia esforsu tomak, tuir kbiit ne'ebé mak ita iha, atu sira pro-integrasionista no sira pro-ukun-rasik an atu tuur hamutuk no hahú halo buat ruma atu rezolve sira-nia diferenza.

Nia husik nafatin ba sorin ezijénsia husu atu iha prezensa internasionál forti liu, ho ridikulariza sira ne'ebé husu forsa manutensaun paz hanoin 'bunyip Napoleon'. Nia hatete ida-ne'e la'ós ho improvizu, komentáriu lais ruma, maibé nia lee buat ruma hakerek iha surat, diskursu planeadu iha lansamentu livru ida iha Parliament House. Nia ko'alia nafatin kontra uza forsa manutensaun paz internasionál nia prezensa. Hafoin sorumutuk ida ho sekretáriu-gerál UN nian, Kofi Annan, nia deklarara:

Ita hein katak sei laiha nesesidade ba forsa manutensaun paz, tanba mak presiza karik forsa manutensaun paz, ita presiza mantéin paz ida no paz ne'e tenke negoseia, no ita hein katak kuandu negoseia ona paz ne'e, paz ne'e sei pasífiku ne'ebé sei la presiza forsa manutensaun paz ruma.

Downer buka halo nia liafuan sira klaru liután. Situasaun iha Timor-Leste la merese forsa manutensaun paz nia prezensa. No labele tau fali forsa manutensaun paz ba difikuldade laran; di'ak liu, 'grupu' sira halo negosiasaun ba 'paz pasífiku ne'ebé sei la presiza forsa manutensaun paz ruma':

[A]mi la'ós hakarak mate-an loos atu haruka tropa Australia nian ba mate, no ema neon-laek de'it mak bele hakarak atu halo ida-ne'e. Sira iha sira-nia moris, ita lakohi tau sira-nia moris ba risku laran, ka atu sira bele lakon sira-nia vida. Ita iha responsabilidade ba sira-nia moris.

Iha buat ida laho lójika liu iha governu Australia nia pozisaun nia fuan/klaran. Hosi sorin ida, sira argumenta katak violénsia iha nivel ida-ne'ebé bele tau forsa manutensaun paz sira-nia vida ba risku. Hosi sorin seluk, violénsia la'ós sériu, tan ne'e prezensa hosi grupu kiikoan ida laho kilat natón ona:

'asisténsia administrativa, observadór sira, asisténsia téknika balu, karik ema balu tan atu bele tulun halo polisiamentu no ita hein katak sei la presiza liután ida-ne'e.

Ne'e duni Timor-Leste seguru natón ba rezolve asuntu ne'e ho hakmatek, maske perigozu bele halo forsa manutensaun paz sira lakon sira-nia vida. Mak ministru estranjeirus ne'e iha vizaun ida katak labele tau tropa sira iha situasaun perigozu, kestaun ida ita bele husu: tropa sira knaar mak sá loos?

Enigma ne'e bele haklaken ho explikasaun ida de'it: governu sei ko'alia no la halo buat ida atu bele prevene forsa manutensaun paz ida atu tama.

Governu nia perspetiva la hanesan ho autoridade sira US nian, no sira laran-susar ba beibeik ho possibilidade violénsia bele mosu. Iha fulan juñu, US nia Komandu Militár iha Pasífiku, bazeadu iha Hawaii foti possibilidade atu hatama ofisiál militár Australianu ba operasaun impozisaun paz ne'ebé mak US hakarak halo iha Timor-Leste. US nia pedidu ko'alia kona-ba atu uza 'forsa dominante ba para tiha matansa' no hato'o ba Komandu Operasoens Australia nian, Vise Marshal Forsa Aérea Treloar. Tanba Treloar mak komanda kuartél-jenerál ne'ebé mak sei supervizona tropa ne'ebé de'it mak atu tama ba Timor-Leste, militár US nian hakarak duni hato'o ba Forsa Defeza Australia nia ofisiál ne'ebé mak tuur iha pozisaun dí'ak liu, atu akonsella governu katak proposta ne'e dí'ak atu hala'o/ezekuta.

Treloar promete katak nia mak sei hato'o rasik pedidu ne'e ba nível aas governu Australia nian. Pedidu ne'e hetan rejeita. Bainhira durante audiénsia iha parlamentu, sira husu kona-ba ida-ne'e, Downer hahú kedas defende katak nia la hatene kona-ba kabograma ne'e no la hatene mós kona-ba pedidu ruma, maske nia destinatáriu ida mós, hanesan mós ba primeiru-ministru, ministru defeza, no sira idaidak nia xefe departamentu. Downer asegura ba uma-fukun ne'e katak nia 'la hatene buat ida kona-ba proposta ruma hosi forsa defeza Estados Unidos nian atu organiza ezersísiu ba impozisaun paz iha Timor-Leste'.

Kabograma diplomátiku ida ho kopia pedidu ne'e nian iha laran, halai-subar ba jornalista ida. Iha loran ne'e, kalan boot ona, governu rona iis katak Age nia edisaun iha loran tuirmai hatama parte-baluk kabograma nian. Downer halai fila ba parlamentu iha tuku 11:32 p.m. no nia halo 'klarifikasaun' ida, dehan katak 'aparentemente' funsionáriu balu mak 'foti informalmente' kestaun ne'e, bainhira 'hanesan posibiidade' husu ba sira kona-ba impozisaun paz. Maibé, nia hatutan tan, ida-ne'e laiha 'pedidu ofisiál ruma hosi governu Estados Unidus nian'. Imprensa la fiar no sira barak hosi públiku bele haree ida-ne'e momoos – govenu buka dala ida tan atu trava intervensaun internasionál iha Timor-Leste. Ida-ne'e ba dala tolu mak Downer halo 'klarifikasaun' hodi kbiit de'it, hosi tempu nia sa'e ba ministru esranjeirus.

Australia rekuza pedidu diretu US nian atu entrega materiál intelijénsia ho detaille links entre forsas armadas Indonesia nian no milisia pro-jakarta sira. Pedidu ne'e sira halo dala barak ba embaixadór Asutralia nian, John McCarthy, no ba Australia nia embaixadór iha US, Andrew Peacock. Enviadu rua ne'e hotu rekuza atu disponibiliza informasaun ne'e. Australia nia ofisiál ligasaun ba US, Merv Jenkins, tenke troka informasaun, hanesan parte normál hosi nia knaar. Komunidade intelijénsia US nian hakarak tebetebes materiál sira ne'ebé liga militar indonesiu ho milisia sira. Bainhira Jenkins fó intelijénsia sira ne'e ba nia kontra-parte sira US nian, autoridade sira Australia nian presiona maka'as nia, no sira semo ba US, interroga nia, no ameasa nia ho prosesu no prizaun. Ho ida-ne'e, tuirmai Jenkins oho-an. Ofisiál senior ida hosi embaixada US nian iha Canberra kontakta ho Dr Dorling iha nia kapasidade nu'udar asesór polítiku Brereton nian, atu hato'o preokupasaun hosi ajénsia sira intelijénsia US nian katak, maske deklarasaun públiku dehan oin-seluk, governu Australia nian kaer metin hela ka atraza atu fahe informasaun ho US, materiál intelijénsia importante kona-ba atividade militar indonesiu no milisia sira-nian.

Testemuña, Sekretáriu adjuntu Defeza DFAT, Sr John Dauth, nian ba Senadu nia Komité ba Relasoens Externas, Defeza no Komérsiu nia efeito hanesan fó kobertura diplomátika ba forsa paramilitár ne'ebé TNI sira kria. Dauth mós kestionadu kona-ba alegasaun ne'ebé nia halo iha DIO nia Current Intelligence Brief ne'ebé halai-subar hosi kotuk ba li'ur:

Senadór Hogg: Departamentu konkorda ho avaliasaun katak militár indonesiu sira bele kaer ka kontrola hela milísia pro-integrasionista sira maibé hili atu la halo nune'e?

Sr. Dauth: Lae, ha'u la konkorda liu ho ne'e. Kontrola situasaun seguransa iha Timor-Leste tarefa ida susar tebetebes. Ida-ne'e governu Indonesia nia responsabilidade, responsabilidade militár no polísia Indonesia sira-nian, maibé ida-ne'e tarefa ida susar tebetebes duni, liuliu tanba milísia sira agora kaer kilat di'ak liu. Susar atu mate. Ho laran-luak, ha'u dehan buat ida desarmamentu, buat ida susar tebetebes duni.

Saida mak Dauth hakarak dehan, klaru, katak buat 'tarefa ida susar tebetebes' ba militár sira atu kontrola milísia sira, ne'ebé mak ho dalan oinsá 'agora kaer kilat di'ak liu'. Faktu maka, militár sira rasik mak fahe kilat ba sira, treina sira, no kaer-metin milísia sira, no sira bele-hela kontrola sira didi'ak.

Bainhira senadór Vicki Bourne husu kona-ba Kopassus (forsa espesiál) nia prezensa iha Timor-Leste, Dauth hatán:

Atu hatete loloos kompozisaun militár indonesiu sira iha Timor-Leste, ha'u laiha liafuan ruma atu hatete, la'ós tanba ha'u hakarak subar buat ruma maibé tanba ami laiha informasaun definitivu kona-ba ne'e. Ha'u labele hatán ho liafuan momoos ... ha'u mós la hatene ida-ne'e loos ka la loos.

Maibé, lialoos mosu bainhira ofisiál Australia no Estados Unidos nian halo diskusaun privadu kona-ba Timor-Leste, iha Washington, foin mak liu de'it loron tolu, iha loron 16 no 17 fulan agostu 1999:

Iha konkorda-malu katak problema fundamentál seguransa nian sei iha nafatin, no forsa Kopassus nian mós sei iha ne'ebá, nune'e estragus mós sei iha nafatin, liuliu iha ajénsia osidentál sira. Ho liafuan seluk, maske bainhira autoridade sira australia nian dehan daudaun iha privadu katak 'forsa Kopassus nia prezensa' maka 'problema seguransa fundamentál', John Dauth dehan ba Sendau katak nia 'laiha duni liafuan atu dehan, karik Kopassus opera duni iha Timor-Leste ka lae.

Howard nia vizita ba US hatuur oportunidade ba nia atu salienta liután situaun nia urjénsia ba presidente US nian. Envezde nune'e, nia minimiza kestaun ne'e, hodi haree liu ba exportasaun na'an bibi-malae ba US. Hanesan nia ko'alia iha konferénsia imprensa ida iha Washington D.C., '**I am lambded out**'. Bainhira nia foti kestaun ne'e, nia hakarak louva de'it governu Indonesia nian no husu tan ba US atu kompreensível liután kona-ba ne'e. Nia hatete-hikas nia pontu-de-vista ida-ne'e iha públiku. Hanesan nia deklara:

Ami hanoin nafatin katak Governu Indonesia merese kréditu maka'as tanba buat rua. Da'uluk tan pasu ne'ebé nia hakat ona ba hakoak demokrasia iha Indonesia tomak, ida-ne'e dezvoltamentu ida istóriu tebes no mós nia kompromisu atu hala'o votasaun ida nakloke ... seluk hosi kestaun bibi-malae, ami gasta liu tempu ko'alia kona-ba Indonesia no Timor-Leste liu fali asuntu seluk ruma ... Ami diskuti Indonesia no Timor-Leste tempu naruk iha ami-nia almosu. Ha'u dehan katak Indonesia merese liután, karik hosi mundu tomak, fiar balu tan, no elojiu no kompreensaun uitoan tan, ba tranzisaun ne'ebé mak orasne'e hala'o daudaun iha país ne'e hodi buka sistema governasaun ida domokrátiiku liután ...

Deklarasaun públiku ba apoiu ne'e, laho kítika ba violénsia ka preokupasaun kona-ba ligasaun milísia-militár, hatudu sinál momoos ba autoridade sira Indonesia nian.

Governu nia diplomasia la'o nafatin hanesan ne'e iha período atu tama ba lora votasaun, ho governu Howard nian halo deklarasaun públika hamoos TNI nia naran, maske iha privadu halo 'representasaun diplomátiku' laho sentidu. Representasaun diplomátiku sira ne'e mak loke dalan ba governu ko'alia ba públiku Australianu katak nia 'foti asuntu ne'e' ho Indonesiu sira. Iha agostu 1999, governu Howard nian halo maizumenus representasaun nune'e dala 120. Iha tempu ne'e tomak, violénsia aumenta liután, hanesan mós governu nia deklarasaun públiku sira katak fiar militár Indonesiu sira.

Iha lora votasaun, 30 agostu 1999, ita bele haree momoos TNI nia kontrolu ba milísia sira ho kuaze laiha intimidasaun/*hamtauk* ruma. Votante barak mak mai partisipa iha votasaun, no rezultadu fó-sai iha sábado, lora 4 setembru 1999. Maske iha ambiente tauk no hamtauk nia laran ne'ebé mak populasaun sujeita hela, kampaña eleitorál unilaterál ne'e, prezensa hosi votante duvidozu hosi Timór Osidental, no tanba votante barak la fiar katak sira-

nia votu ne'e sekretu, 78,5 pur sentu hosi votante rejistadu, sira hili atu independente hosi Indonesia.

Iha sorumutuk ida iha Díli semana ida molok referendu, Indonesia nia avaliasaun dehan katak referendu nia rezultadu sei besik, laiha parte ida mak sei hetan boot liu 60 pur sentu hosi votasaun ne'e. Rezultadu mai halo sira fuan-haksoit. Informasaun ne'ebé DSD intersepta hatudu katak Major-Jenerál Zacky Anwar Makarim husu kontaktu polisia ida oinsá kontajem votus nia lala'ok. Ofisiál polisia ne'e dehan katak ho sura ona votus 50 pur sent, parese 20 pur sentu de'it mak hili opsaun autonomía-ho-Indonesia. Anwar parese la bele fiar, hodi husu: 'Ó hatete ne'e tebes ka? Bele sai onisá?' Nia hatete tan katak iha Timor-Leste tomak, família sira hasa'e bandeira mera-puti Indonesia nian. Ho votasaun la'o kontra sira, Zacky Anwar no planifikadór militar sira seluk hanoin ona katak sira tenke halo buat ruma lalais.

Terrorismu ho patrosíniu hosi estadu

Bainhira fó-sai rezultadu hosi votasaun, autoridade sira Indonesia nian muda lalais kedas atu adapta planu kontinjénsia ne'ebé sira iha. Hamutuk ho halo evakuasaun ema apoiante pro-integrasaun lubuk oan ida no ema Indonesiu rezidente balu, sira hasai ema hosi sira-nia uma iha parte rai-klaran no loromonu Timor-Leste nian, no tau iha transporte hosi rai no hosi tasi lori ba Timór Osidental no parte seluk Indonesia nian.

Maske Indonesia nia hahalok sira ne'e, hanesan koko lufu-lafu de'it ba adapta ba situaun ida sira la espera, buat sira ne'e hanesan mós expresaun konsiente polítika estadu nian. Indonesia nia ministru defeza ema sivil da'uluk, Juwono Sudarsono, ikusmai hatuur buat hotu momoos bainhira nia rejeita pedidu ba investiga ofisiál senior sira: 'Ami la bele sa'e ba sira iha eskalaun aas ne'ebá, tanba sira kumpri de'it polítika estadu nian'. Ema baibain hanoin katak militar Indonesia nia kampaña terror ne'e hanesan resposta ida brutal no viserál hasoru rejeisaun. Ida-ne'e sorin ida de'it mak tebes. Populasaun, ne'ebé hatene nanis katak ho forsa mak ema sama sira, rejeita la'ós de'it Indonesia nia domíniu, maibé ideia partikulár ida Indonesia nian – ida ne'ebé hanoin katak populasaun ne'ebé hakruuk ba sira hanesan 'masa flutuante' ne'ebé sei tuir de'it ordem hosi governante sira. Tanba ne'e reasaun punitiva ho ran-nakali sei tuir kedas. Maibé, ida-ne'e la'ós verdade kompletu; buat loos maka, ida-ne'e

taka de'it pontu sentrál kona-ba kampaña terrór – ne'ebé mak prepara ho kuidadu boot nia intensaun, tempu, no fatin.

Maske sira-nia aspetu profundu no punitivu hotuhotu, objetivu prinsipál hosi Indonesia nia kampaña terror ne'e maka atu muda tiha votasaun nia rezultadu. Tenke desakredita nu'udar fraudulentu, ho sujere katak maioría Timoroan sira ba vota ho sama metin ba sira-nia fiar verdadeiru. Dalan diplomátiku ida-ne'e funsiona duni la'o hamutuk ho kampaña terror hosi militar sira. Alegasaun ba parsialidade mosu kedas ona iha loron votasaun duni, kuandu sira haree katak ema barak tebes mak mai vota hodi hatudu sinál ida katak kampaña hamtauk la halo buat ruma (la funsiona). Funsionáriu indonesiu ida lori lista ho 'violasaun' 37 hosi pesoál UNAMET nian, no nia dehan katak votasaun ne'e 'la vale buat ida', la lejítimu, la justu no la transparente liu'. Sira balu alega – la hatudu evidénsia ruma – katak UNAMET nia staff obriga sira atu vota ba ukun-rasik an. Komisáriu eleitorál UNAMET nian investiga alegasaun hirak ne'e, no to'o konkluzau katak alegasaun hirak ne'e laiha baze: 'laiha ida – mesak ka hamutuk – mak prejudika prosesu ne'e nia la'o'.

Dalan diplomátiku ne'e la'o hamutuk ho imajem dramátiku sofrimentu umanu, hodi taka de'it observadór sira-nia matan ba buat sira-ne'ebé mak la'o hela iha ne'ebá. Militar indonesiu sira presiza hasai tiha estranjeiru sira hosi Timor-Leste hodi tuirmai sira bele ezejuta sira-nia planu, laiha impedimentu ruma hosi ema li'ur nia haree. Ne'eduni, ba sira-nia sensasionalismu no imajem violentu hotuhotu, ezejusaun kampaña terror ne'e halo ho kontrole dí'ak. Kampaña militar ne'e atu la'o ho etapa tutuir malu hanesan tuirmai:

1. Uza sira-nia kriasaun milísia hodi hapara no hasees tiha observadór internasionál sira.
2. Bainhira laiha ona internasionál sira atu halo denúnsia, uza milísia hodi ba ataka populasaun lokál sira no tula sira iha kareta, hakat liu fronteira ba Timór Osidental.
3. provoka sira rezisténsia armada (Forsas Armadas ba Libertasaun Nasionál Timor-Leste nian, ka FALINTIL), sira ne'ebé ema ladún barak, atu halo retaliasaun ruma, hodi nune'e bele tama ba halo funu konvensionál.
4. Fo-hatene públiku katak TNI tenke intervém iha 'faksaun'(grupu) sira hasoru-malu, no nune'e, livre ona hosi restrisaun, ba ataka no destroi FALINTIL iha funu konvensionál.
5. Kria faktu foun seluk iha terrenu, hodi asegura katak rezultadu hosi votasaun labele tan fila fali ba kotuk.

Atu kompleta tan Indonesia nia estratêjia, governu Howard halo nafatin deklarasaun atu hasai tiha presau hosi Indonesia. Ministru estranjeirus Downer, nu'udar ezemplu, argumenta katak prezidente Habibie, ministru estranjeirus Alatas, Jenerál Wiranto no seluk tan 'sira hotu buka atu halo buat loos'. Komandante sira seluk mós 'buka hela atu halo buat loos'. Problema maka, dala ida tan, iha sira 'elementu fuik balu iha militár Indonesia nia leet' ne'ebé halo buat konforme sira-nia hakarak de'it.

Etapa 1: Uza sira-nia kriasaun milísia hodi hapara no hasees tiha observadór internasionál sira.

Estranjeirus sira hetan tratamentu la hanesan ho ema timoroan sira. Ema hamtauk sira no dudu sira ba halibur hamutuk iha fatin ruma ne'ebé sira labele haree rasik saida mak la'ó daudaun no bele karik relata ba mundu rai li'ur, maibé sira la halo aat ba sira. Iha razaun boot ba ida-ne'e: indonesiu sira sei hanoin momoos tebes difikuldade diplomátika ne'ebé mak hasoru iha Australia no iha rai seluk hafoin jornalista osidentál nain neen mate iha 1975. Kompara ho ida-ne'e, ema Timoroan mate rihun-ba-rihun ho invazaun iha 1975, no ema indonesia rihun atus-ba-atus mate iha 1965-66, ladún halo sira liuhosi difikuldade barak hasoru govenu osidentál sira. Sira hakarak evakua estranjeiru sira, la'ós atu oho sira.

Australia nia planu evakuasaun monu didi'ak ba Indonesia nia estratêjia. Entre loron 6 no 14 setembru, observadór internasionál nain 2.475, jornalista, no staff lokál no internasionál evakua ba Darwin ho aviaun Hercules C130 RAAf no RNZAF nain.

Ian Martin, xefi UNAMET nian, fó ordem atu evakua staff UN nian, jornalista sira, no observadór sira hosi kompleksu/compound, ne'ebé tama ona iha kondisaun estadu-de-sítu, iha loron 8 fulan setembru. Mak evakuasau ida-ne'e halo karik, sei bele hamosu, konserteza, violasaun no asasinatu ba ema refujiadu nain 1.500 ne'ebé mak abriga hela iha fatin ne'ebá. Ho laran-hirus, staff internasionál sira hamutuk rekuza/lakohi evakua, to'o lori-sai uluk refujiadu sira hotu ba fatin ruma seguru. Sira-nia rekuza atu husik fatin ne'e tuir planu evakuasaun ne'e hamosu tristeza boot iha Nova Yorke. Ofisiál sira UN nian tenke rekonsidera hikis ordem evakuasaun ne'e. Hanesan konsekuénsia, aviaun mai foti refujiadu sira ba fatin seguru iha Darwin. Bainhira evakuasaun ne'e remata ona mak staff internasionál sira foin husik kompleksu ne'e.

Etapa 2: Uza milísia hodi ataka populasaun lokál sira no tula sira hakat liu fronteira.

Timoroan sira, la hanesan ho observadór internasionál sira, ema ataka sira no hasai sira hosi sira-nia uma laran. Halibur sira hamutuk no tula sira ba karreta no ro-ahi hodi lori sira ba Timór Osidental no fatin seluk tan. Tuir Nasoens Unidas no investigasaun ne'ebé Indonesia nia Komisaun Nasionál ba Direitus Umanus halo hafoin akontesimentu hirak ne'e, besik 70 pur sentu edifisiu sira iha Timor hetan destruisaun. Infraestrutura importante sira hetan estragus, halo bee, eletrisidade, ka telefone iha Díli no kapital distritu sira laiha. Timoroan rihun-ba-rihun tauk no halai hotu ba foho ka tama kompleksu UN nian, ne'ebé serkadu no izoladu. Momoos katak ida-ne'e kampaña organizada ida, planeadu diretu hosi jenerál senior Indonesiu sira, ne'ebé buka atu muda votasaun nia rezultadu no kria faktu demográfiku foun iha terrenu.

Etapa 3: Provoka FALINTIL hodi hein retaliasaun hosi sira.

Kampaña terrór ida-ne'e bele iha benefisiu adisionál ida bainhira sira provoka FALINTIL atu monu ba halo retaliasaun ho lakon-neon, nune'e dudu sira ba buat ruma ne'ebé besik ba funu konvensionál, no klaru katak TNI mak iha vantajem liu. Reasaun ruma hosi FALINTIL sei halo Indonesiu sira hatete katak sira tenke intervém iha 'faksaun' sira nia klaran. Presaun ba FALINTIL nia leten maka'as tebetebes duni. Iha Uai Mori iha kosta norte, Taur Matan Ruak (Komandante Operasionál, FALINTIL nian) simu relatu kona-ba destruisaun no halo besik imposível atu la reaje. Ko'alia ho Xanana hosi telefone-satélite iha loron 7 setembru, iha loron nia sai hosi prizaun-domisiliária, Matan Ruak dehan nia sentimentu ba Gusmão. Gusmão husu ho haraik-an atu sira labele sai hosi akantonamentu no, hafoin mesnsajem balu tan laho pasiénsia, Ruak simu/konkorda.

Etapa 4: Fo-sai ba públiku katak TNI tenke tama iha 'faksaun/grupu' sira-nia klaran, no nune'e buka hamate FALINTIL ho funu konvensionál.

Indonesia nia estratéjia failla iha pontu ida-ne'e. Bainira nia impoin lei marsiál ho pretextu 'intervém iha faksaun sira-nia klaran', no hatete nafatin katak iha manipulasaun ba votasaun, nia labele hakat tan ba oin, no nia tenke retira kedas ona hosi Timor-Leste.

Indonesia fo-sai ba públiku katak sira sei dekreta lei marsiál ba Timor-Leste hahú iha meia-noite loron 6 setembru. Bainhira buat sira ne'e la'ó daudaun, sira hahú, iha segredu laran, tau/koloka eskuadraun-de-morte iha fatinfatin hodi buka no oho lider sira movimentu ukun-rasik an nian. Transkrisaun hosi intelijénsia sinál Australia nian, sai-subar ba públiku iha 2002, hatudu katak eskuadraun-de-morte hirak ne'e lori naran hanesan KIPER-9. KIPER ne'e maihosi grupu ema Indonesia sira-ne'ebé hakarak asegura votasaun ida livre no justu, no nune'e sira desidi atu monitoriza sira-nia an rasik. Koñesidu hanesan Komite Independen Pemantau Suara, ka Komite Independente ba Monitorizasaun Diretu Votasaun, KIPER ne'e grupu ida hosi grupu barak populasaun sira forma hodi halo monitorizasaun votasaun. Ho fó naran hanesan KIPER-9 ba eskuadraun-de-morte ne'e, militar Indonesiu sira tuir nafatin sira-nia estratéjia negasaun razoável. Tuir termu sira lei marsiál nian, podér tomak iha administrasaun sivíl nia liman pasa hotu ba militar sira. Ida-ne'e hanesan formalidade ida de'it, konserteza; hori uluk kedas militar sira mak autoridade iha Timor-Leste. Maibé, formalidade ne'e fó pretextu ba harii faktu foun iha terrenu hafoin halo asaltu ba FALINTIL.

Lei marsiál atu dehan katak soldadu sira bele 'para see de'it no halo revista buka kilat, prende see de'it mak suspeitu kria distúrbu ba loron 20 la presiza mandadu hosi tribunál, no tiru hasoru see de'it mak viola rekollér obrigatóriu'. Buat ida-ne'e nia efeitu maka atu nakfilak Timor-Leste ba zona tiru-livre ida, signifika katak TNI sira bele ataka no harahun FALINTIL iha funu konvensionál. Impozisaun lei marsiál akompañia ho alegasaun baibain katak iha violasaun ba votasaun. Indonesia nia representante permanente iha UN repete-hikas alegasaun hirak ne'e bainhira nia deklarasaun katak violénsia mosu tanba: deskontamentu boot iha faksaun pro-autonomia sira-nia leet tanba rezultadu hosi referendu, hamutuk tan ho UNAMET nia faila atu responde ho di'ak ba relatu sira kona-ba irregularidade sira mosu molok no durante votasaun.

Indonesia insisti nafatin katak intervensaun internasionál inaseitável. Hamutuk ho deklarasaun sira halo kona-ba ne'e, iha tan dalan rua ne'ebé mak sira subliña sira-nia insisténsia. Da'uluk atu ko'alia kona-ba violénsia no perigu, hatene nanis katak governu osidental sira sei la simu bainhira mate ka kanek. Ali Alatas, bolu atensaun katak misaun manutensaun ba paz estranjeiru ruma sei simu ema mate, ko'alia kona-ba 'faila hosi misaun sira hanesane'e kuandu ladauk iha paz ruma atu mantein'. Da'ruak maka anúnsiu katak hatama tan tropa ba Timor-Leste.

Ba 'manutensaun lei ho ordem' de'it, sira-nia signifikadu klaru tebes, no rekoñesidu nune'e hosi planifikadór militar sira iha rai li'ur – governu estranjeiru hanesan Australia haree momoos katak intervensaun unilaterál ruma sei hasoru opozisaun armada. Dala balu, amesa ne'e momoos loos: Xefe Forsa Aérea Indonesia nian aviza katak nia forsa sira 'prontu atu hasoru intruzu ne'ebé de'it hosi Australia'. Sira fo-sai avizu seluk klaru no loloos, karik mensajem ne'e imi la simu karik: 'Nasaun ne'ebé de'it hakarak haruka forsa manutensaun paz ba provínsia ne'e sira tenke loke dalan atu tama'. Avizu ministru estranjeirus Ali Alatas (no Ofisiál Ordem Autoridade) nian ne'e, koincidi loos ho governu Australia rasik nia ko'alia kona-ba vítima no sira hosi forsa manutensaun paz bele lakon sira-nia vida.

US nia reasaun ulukliu ba kampaña limpeza étnika ne'e, sira dehan katak laiha intervensaun militar ruma. Sira fó sinál ba Indonesiu sira katak sei laiha opozisaun ruma maka'as hosi US ba saida mak sira halo ba Timor-Leste, maske sira tenke halo sasán lais hodi hasai tiha manas hosi kestaun nia leten. US nia embaixadór ba Indonesia, Stapleton Roy, hasoru presidente Habibie, maibé dehan sira la ko'alia kona-ba kestaun forsa militar manutensaun paz:

Ami la'ós atu diskuti ida-ne'e iha ne'ebá. Ami ba tuur hamutuk hodi buka hanoin ruma ne'ebé bele tulun. Ami iha ne'ebá la'ós atu halo proposta ruma kona-ba militar manutensaun paz. Ami iha ne'ebá hodi buka oinsá tulun Indonesia ho nia responsabilidade atu mantéin ambiente di'ak ba seguransa no oinsá comunidade internasionál bele tulun di'ak liután.

Iha Pentágono nia halibur iha loron 7 setembru 1999, porta-voz Defeza nian Kenneth Bacon ko'alia kona-ba 'problema balu infeliz no lamentável iha Timor-Leste'. Nia dehan katak US nia pozisaun klaru:

Ami sei kontinua habrani ba autoridade Indonesiu sira atu fó seguransa. Da'ruak, ami sei hein relatóriu hosi ekipa investigasaun UN nian, no bainhira ami iha ona informasaun ne'e iha liman, mak ami sei desidi saida atu halo.

Asesór Seguransa Nasionál Sandy Berger mós hato'o sinál ba Indonesiu sira katak, maske sira tenke hakotu lalais ona operasaun, US sei la intervém:

Ha'u-nia oan-feto iha apartamentu ida runguranga loos iha fakuldade, karik ha'u la presiza intervém atu nia arruma didi'ak nia sasán sira. Ha'u hanoin laiha ema ruma hatuur ona doutrina ida ne'ebé dehan katak ita tenke intervém bainhira de'it mak problema umanitariu ruma mosu, iha ne'ebé de'it.

Xefi sira TNI nian nota katak presidente Habibie ladún ona iha kbiit atu tahan presaun hosi li'ur, ne'ebé hahú sa'e ba beibeik. Ho nia reputasaun ema ida ho hahalok impulsivu, nia bele karik halo anúnsiu ruma laho sira-nia aprovasaun, hanesan nia foin daudaun halo iha okaziaun seluk. Ne'eduni importante tenke hametin liután nia determinasaun – no hatuur klaru see mak tuur iha komandu. Hafoin lider militar senior sira-nia sorumutuk ida, Wiranto ba vizita Habibie hodi hafanu nia kona-ba halo tuir pedidu sira hosi rai li'ur. 'pozisaun hatudu múskulu klaru hosi militar indonesiu sira' ida-ne'e, hanesan lia-menon maka'as ida kona-ba TNI nia kbiit.

Xefi sira TNI nian, tetu ba situaun, halo sira hanoin katak sira bele hasees uitoan presaun hosi rai li'ur ba tempo natón hodi nune'e sira bele kria faktu foun iha terrenu. Ne'eduni Indonesia laiha problema atu haluha tia ofisial sira UN nian hanesan Mary Robinson, Alta Komisária ba Direitus Umanus, ne'ebé husu atu halibur 'sesaun esepial Komisaun UN nian ba Direitus Umanus'. Indonesia bele mós subar tia misaun ema nain lima hosi Konsellu Seguransa ne'ebé to'o iha Jakarta iha lora 8 setembru, liuliu tuir deklarasaun hosi ema ne'ebé haruka sira, presidente UN nia Konsellu Seguransa nian, Arnold Peter van Walsum hosi Olanda. Van Walsum hatete klaru katak Konsellu Seguransa sei la autoriza atu hatama forsa sira hosi rai li'ur bainhira laho konsentimentu hosi governu Indonesia. Hodi admiti duni saida mak Indonesiu hatane ona – katak misaun Konsellu Seguransa UN nian ne'e laiha influénsia laho 'poder nia mahon iha prosesu negosiasaun laran' – van Walsum dehan: 'Ha'u asegura ba imi katak Konsellu Seguransa sei la fó lampu modok bainhira laiha permisaun hosi parte governu indonesiu nian'.

Governu Australia nian kontinua halo nafatin deklarasaun públiku ne'ebé mak hasai tiha presaun hosi Indonesia. Iha lora, tuir lora ne'ebé fo-sai ba públiku rezultadu hosi votasaun, kuandu UNAMET nia eskritóriu rejional barak taka ka ema ataka, Downer deklarara: Ha'u iha impesaun katak Presidente Habibie, Sr Alatas, Jenerál Wiranto, sira buka halo de'it buat loos. No komandante sira balu, momoos, buka mós halo sasán loos. Maibé uluk iha elementu fuik balu no sei iha nafatin sira ne'e iha militar indonesiu nia leet.

Laiha mudansa signifikativu hosi pozisaun ida-ne'e ho violénsia aumenta ba beibeik. Pedidu atu haruka tropa tama hetan beibeik resposta padraun: Australia labele invade Indonesia. Hanesan Australia nia ministru defeza hatete, 'ita labele ba iha ne'ebá no invade Indonesia. Ida-ne'e sei, imi hatene, hanesan hahú funu boot ida, no ne'e bele halo, ha'u hanoin, ema mate saugati de'it hosi nasaun rua hotu'. Downer sei aviza tan katak bainhira invade 'nasaun ne'ebé ho populasaun barak liu iha pozisaun da'haat iha mundu, karik sei la'ós buat di'ak ida'.

Klaru, la'ós arbiru de'it mak ema ruma bolu Indonesia halo invazaun. Hamutuk ho faktu klaru katak poténsia Osidental sira mak halo daudaun duni invazaun réal ida (ba Kosovo, Yugoslávia nia provínsia), Timor-Leste hori uluk kedan nunka halo parte ba Indonesia. Saida mak sira eziji maka atu hapara ona hasai tiha observadór estranjeiru sira, no tau tan presau diplomátika ba Indonesia. Kontráriu, governu sei reklama nafatin katak autoridade sira Indonesia nian 'buka halo de'it buat loos'.

Hatudu de'it katak ema ida sei la sadik saida mak militar sira halo iha terrenu.

Maibé forsa seluk ida ho kbiit boot liu, hader daudaun ona.

Ativista australianu sira no movimentu sindikal sira hahú book an, hodi tau maka'as liután presau ba governu nia leten. Iha Sydney, asaun protestu da'uluk forti hala'o iha segunda, 6 setembru, bainhira ativista sira hosi movimentu solidariedade internasionál no sira atus-ba-atus hosi sindikatu sira halo protestu iha liña aérea Garuda nia eskritóriu oin. Sira eziji atu retira tropa Indonesia nian hosi territóriu no hatama forsa manutensaun paz. Hosi protestu ida-ne'e maka, tuirmai, ativista lubuk ida hosi ASIET (Action in Solidarity with Indonesia and East Timor) sujere atu harii ho urjenti komité organizadór ida atu bele prepara manifestasaun públiku ba sábadu, lora 11 setembru. Steve Dixon, organizadór ida iha ona experiénsia barak ho Sindikatu Enerjía, Mineira, Floresta no Konstrusaun (CFMEU iha sigla inglés), no Tony Vicente, organizadór seluk ida CFMEU nian ho ligasaun forti ho comunidade Portugeza no Timorensé iha Sydney, konkorda kedas, no simu hodi hala'o sorumutuk ne'e iha sindikatu nia eskritóriu iha sidade.

Sorumutuk hala'ó kedas iha kalan ne'e. Ema besik 60 reprezenta grupu interesadu oioin maka partisipa iha sorumutuk ne'e: Australia Timor-Leste Association, ASIET, sindikatu barak, grupu uma-kreda nian, no seluk tan. Sira hotuhotu rekoñese katak mamifestasaun iha 11 setembru maka importante tebes, no sira kokorda atu servisu la para atu halo protestu ida boot no maka'as liu. Hanesan Jon Lamb hosi ASIET dehan, 'Ami sai hotu atu ba halo de'it 11 setembru no buat hotu nakfera hosi ne'ebá'. Steve Dixon promete atu 'ema balu fahe panfletu iha dalan hotuhotu iha Sydney laran'.

Iha semana ida-ne'e nia laran ativista sira-nia moris laronloron la'ó ho matan-dukur no isin-kole. Sira barak servisu la para, harii barraka ba kampaña iha fatin barak no fahe panfletu kona-ba prepara manifestasaun laron 11 setembru nian. Fundu ba atividade hirak ne'e, barak mai hosi CFMEU, grupu boot liu no ho finansiamentu di'ak liu iha movimentu ne'e nia laran. Amnistia Internasionál organiza vijília ida iha anfiteatru Martin Place. Uma-Kreda sira mós mobiliza sira-nia kongregasaun. Iha semana ne'e nia laran, kalankalan, selebra misa iha eskritóriu sira Nasoens Unidas nian iha York Street. Tempu tomak nia laran, públiku nia konsiensializasaun sa'e beibeik tanba kobertura maka'as ne'ebé mak kestaun ne'e hetan ona iha mídia boboot sira.

Iha laron 8 fulan setembru, manifestaun boot ida la'ó iha sidade. Traballadór 4000 nune'e, liuliu membru sira hosi CFMEU iha fatin konstrusaun sira iha sidade, husik tia sira-nia servisu no tama hotu ba manifestasaun ne'e. CFMEU hetan tan apoiu hosi membru balu sindikatu seluk nian. Traballadór sira foti foer – ho apoiu totál hosi Randwick Council – rekuza ba foti lixu iha konsuladu Indonesia nian.

Traballadór sira impresaun rekuza uza produktu surat/papél halo iha Indonesia. Federasaun Emfermeirus Australia nian deklara sira-nia apoiu ba asaun sira hotu ne'ebé halo hela daudaun no fó-hatene ba públiku katak sira tau sira-nia membru balu prontu hela atu ba Timor-Leste mak presiza karik.

Sindikatu Edukasaun Australia nian husu ba eskola públiku hotuhotu atu halo silénsia minutu rua iha meidia laron-tersa, 7 setembru. Kampaña la'ó lais liután, impulsionadu hosi membru sira-nia ativismu iha tinan barak ba kotuk. Sindikatu Edukasaun Independente ACT no NSW nian rezolve fó apoiu ba CFMEU no sindikatu sira seluk iha sira-nia asaun. Matirime Union of Australia (MUA) impede traballadór sira hatama karga ba ró-ahi hotuhotu ho destinu

atu ba Indonesia. Bunga Teratia III hetan atrazu iha Port Botany to'o nia na'in konkorda atu la transporta kontentór karga 16 ho destinu ba Indonesia. Iha Newcastle, ema sira impede Cape Horn atu hatama karga ho destinu ba Indonesia. Iha Brisbane, ema sira la husik Chekiang sai hosi portu to'o deskarrega tiha kontentór 30 atu lori ba Indonesia. Iha Melbourne, produ tu ho folin millaun/tokon \$22 husik hela iha rai-maran. Iha Adelaide, MUA lori kontentór 20 ba hatama hela iha armazém ida no deklarata katak sira sei la fo-sai to'o Timor-Leste hetan liberdade. Federasaun Internasionál ba Traballadór Transportes nian husu ba nia afiliadu sira hotu iha mundu tomak atu halo tuir MUA nia ezemplu no 'organiza asaun protestu kontra Indonesia nia interese komersiá hanesan tráfegu aéreo no marítimu tama ba ka sai hosi Indonesia nia portu no aeroportu sira'.

Iha aeroportu Melbourne nian, ema para pasajeiru atu tama ba aviaun Garuda Airlines hodi semo ba Indonesia ne'ebé atu semo iha tuku 11.00 a.m. Sira-nia dalan traballadór konstrusaun sira taka tia iha terminál aeroportu nian, no fó ba sira panfletu ho husu deskulpa tanba teri netik sira-nia dalan maibé explika mós ba sira tansá mak sira halo ida-ne'e.

Tuir fali mai, xefi sira CFMEU Victoria nian hatudu mós sira-nia intensaun atu halo asaun hanesan kontra voo seluk Garuda nian to'o violénsia iha Timor-Leste remata. Sira fó-hatene mós ba Qantas katak sira sei teri netik tentativa ruma atu lori pasajeiru sira ne'ebé Garuda husik hela.

Sindikatu Servisus Australia nian deklarata katak sira mós aplika proibisaun ba Garuda Airlines. Sindikatu Traballadór Transportes nian proibi karregamentu frete hotu Indonesia nian iha aeroportu Melbourne. Ida-ne'e sira halo duni maske hasoru ameasa hosi empregador sira. Nu'udar ezemplu, Qantas nia 'staff' iha Melbourne simu avizu katak sira bele prosesadu tuir Workplace Relations Act no Trade Practices Act karik sira lakohi kaer sasán ka atraza kaer sasán frete Garuda nian. Traballadór sira responde ho halo sira-nia asaun maka'as liután.

Provokasaun naklekar iha movimentu sindikál nia leet. Sindikatu Komunikaun, Eletridade no kanalizasaun nian, ne'ebé reprezenta mós traballadór sira korreiu nian, obriga atu halo proibisaun nasional ba korreiu hotuhotu, servisus telekomunikaun nian, no repara avaría iha konsuladu Indonesia nian no ba negósiu hotu Indonesia nian. Sindikatu Traballadór Australia nian aumenta liután presau, hodi dehan ba BP, Caltex no Shell atu lalika hatama minarai Indonesia nian, tanba sira-nia membru sira bele rekuza atu prosesa minarai hosi

Indonesia. Ida-ne'e signifikativu tebes tanba sindikatu nia lokalizasaun estratéjika: krude Australia hatama hosi rai-li'ur nia baluk-tolu ida (katuluk ida) maihosi Indonesia. Sindikatu sira Teixtil, Roupa no Kalsadu Australia nian konkorda atu apoia kampaña ne'ebé de'it atu hapara violénsia. Nia konvoka instrumentu sira estaduál no federál nian, nomos Komité Organizadór Sydney nian ba Jogos Olímpikus no Komité Paralímpiku Organizadór Sydney nian, no kampaña hotuhotu iha fábrica iha Indonesia , atu suspende kedas kontratu produsaun.

Iha aeroportu internasionál Sydney, Garuda nia balkaun check-in fila an ba fatin protestu blokeiu. Estudante universitáriu no eskola sekundária sira sai hosi sala laran hodi marxa ba Sydney Town Hall. Traballadór barak halo sorumutuk emerjénsia no tuirmai husik sira-nia servisu hodi tuir sira. Iha fatin sira konstrusaun nian iha Sydney, organizadór sira CFMEU nian hamutuk ho oradór timoroan sira ko'alia ba traballadór sira hodi explika ba sira kona-ba manifestasaun boot atu halo iha loron tuirmai. Traballadór sira konstrusaun nian vota ba kontribuisaun ida sira atu fó dólar \$5 ba leten hanesan apoiu ba kauza Timor-Leste nian.

Manifestasaun boot iha sábado, loron 11 fulan setembru halo iha Archibold Fountain iha Hyde Park.

Karik aspetu ne'ebé mak hatudu momoos hosi demonstrasaun hirak-ne'e maka sira halibur ema barak ba beibeik, hosi ema atus balu iha semana nia hahú to'o liu 30.000 iha semana remata, iha Sydney de'it. Protestu hada'et no mosu mós iha sidade sira seluk Australia nian tomak. Protestu hirak-ne'e la'o ho sí'ak no frustasaun maka'as liu, bainhira governu Howard nia polítika apoiu militar Indonésiu sira nakloke ba públiku. Demonstraun públiku sira ne'e aumenta ba beibeik manifestasaun boot liu no ho laran-nakali, no hahú halo mós sindikatu sira haree ho ran-nakali.

Haree ba ema sira-nia laran-nakali nune'e mak governu, tenke, ikusmai husik tiha defende militar indonésiu sira.

Governante sira preokupadu ho públiku Australianu kestiona tansá mak US nia resposta fraku liu nune'e. Sira tauk atu lakon apoiu públiku ba aliansa ho US.

Iha Estados Unidus, governu Clinton nian hatene kona-ba públiku Australianu nia laran-taridu no laran-susar maka'as. Públiku Australianu nia 'kestiona kona-ba aliansa Australia-US, halo governu tuur lametin.'

Iha Kongresu US nia laran, Senadór no Representante balu husu intervensaun urjenti. US nia Senadór Russell Feingold hatama lejislasaun atu bele obriga 'suspende kedas asisténsia' ba Indonesia. Representante Patrick Kennedy hatama mós proposta hanesan iha House of Representatives. Proposta-lei atu bele suspende US nia asisténsia militar hotuhotu no husu US tenke 'kontra empréstimu ruma ka asisténsia seluk hosi instituisaun finanseira internasionál sira no husu ba país doador sira seluk atu halo hanesan.' Sira-nia proposta-lei la liu iha sesaun lejislativa nia laron sira ikus, maibé Admnistrasaun Clinton asombradu ho perspetiva ba nia susesu iha semana balu tuirmai nia laran.³⁴

Presaan maihosi fatin importante liu ba Prezidente Clinton duké ba polítiku sira iha Partidu Demokrátiku. Iha 1999, Partidu Republikanu kontrola Senado no mós House of Representatives. Lahanesan iha tinan tolu hafoin masakre Santa Cruz, tempu ne'ebé membru sira hosi Partidu Demokrátiku iha kbiit atu aprova sira rasik lejislasaun ruma, Partidu Republikanu nia apoiu importante tebes iha tempu ida agora ne'e. Aliadu foun ida mosu kedan hafoin rezultadu eleisaun fó-sai ba públiku: William P. Clark, ex-asesór Seguransa Nasionál ba Prezidente Ronald Reagan no Sekretáriu Estadu Adjuntu iha governu Reagan. Reagan uluk deskreve Clark hanesan nia belun mesak iha governu laran. Clark, ne'ebé iha sírkulu Republikanu nian, sira respeita tebetebes, nia mós ema Katóliku ida. Ikusmai nia simu Holy Cross Ecclesia et Pontifice, medailla aas liu ne'ebé mak Papa bele fó ba leigu ida tanba nia servisu di'ak ba Uma-Kreda. Steve Steele, jornalista Katóliku ida iha jornal Arkidioseze nian iha Nova York, vizita Timor-Leste iha tinan 1999 no nia preokupa tebetebes ho haree ba destruisaun ne'ebé mak Timoroan sira hasoru hafoin votasaun. Lihosi nia belun ida, nia tau Clark kontaktu ho ativista tinan barak nia laran Arnold Kohen, ne'ebé explika situaun iha terrenu no iha Kongresu ho klean. Clark kontakta kedan Republikanu influente sira iha Senado no liuhosi privadu, akonsella sira atu suporta maka'as intervensaun internasionál iha Timor-Leste.

Reasaun fofoun hosi Republikanu influente sira maka, sira hanoin US labele envolve an iha kestaun ne'e. Senadór Kay Bailey Hutchison, senadór Republikanu hosi Texas no

³⁴ L. Dinger, 2000, pp. 7-8.

membru Subkomité Dotasoens Defeza nian, dehan katak 'ko'alia kona-ba marxa ba fatin seluk ruma iha mundu, ne'ebé laiha ameasa klaru ba seguransa interese US nian, ne'e buat la loos.' Iha loron balu nia laran, maske nune'e, nia hakerek artigu ida iha Washington Post ne'ebé dehan 'Labele la'o sala: US nia interese estratéjiku sira iha Timor-Leste bele tama ba risku.' Representante Benjamim Gilman, presidente republikanu ba Kámara nia Komisaun Relasoens Internasionais, dehan katak 'Prezidente Clinton labele limita opsaun ba polítika Amérika nian. Ida-ne'e bele de'it hamenus Amerika nia kbiit atu lidera. Maske Timor-Leste bele illa kiikoan ida de'it iha Sudeste Asia nian, maibé Estadus Unidus iha autoridade morál ba antesipa jenosídiu seluk atu mosu iha fatin estratejiku importante iha mundu nia sorin ida-ne'e. Senador Republikanu Craig Thomas, presidente Subkomisaun Asia Orientál nian, fó-hanoin katak 'karik sei presiza buka medida ruma iha Kongresu no iha UN atu bele obriga Indonesia kumpri nia responsabilidade sira. Ha'u sei apoia forsa manutensaun paz ruma, karik Indonesia la book an.' Republikanu seluk ne'ebé ko'alia kontra US nia envolvimentu, muda sira-nia pozisaun ka lakon tiha iha sírkulu notísias. Clark nia lobby influente selu ona nia dividendu.³⁵

US nia dada an uluk atu envolve tanba, klaru, laiha tan seluk maibé Australia de'it, mak halo lobby atu lalika simu forsa manutensaun paz atu tama. Governu Australia to'o rejenta US nia Subsekretáriu Estadu Stanley Roth nia sujestaun sira kona-ba forsa manutensaun paz. Maibé, ohinloron, ida-ne'e muda kompletu nia dalan. Ofisiál senior sira US nian hahú envolve kedan iha esforsu atu haruka forsa manutensaun paz ba Timor-Leste.

US asegura katak nia mensajem ba militár Indonesiu sira entrega ho liman; Admiral Dennis Blair, Komandante-Em-Xefe forsa US nian iha Pasífiku, hasoru malu ho Jenerál Wiranto iha Jakarta iha loron 8 setembru 1999. Subsekretáriu Estadu Thomas Pickring explika ba Kongresu iha loron tuirmai katak sorumutuk ne'e atu buka 'halo klaru liután kosekuénsia grave

³⁵ Clark and Kohen developed a long-term working relationship. Clark continued his engagement with Timor-Leste in the years leading to Timor-Leste's formal independence in 2002. In mid-to-late 2001, for example, he used his influence in the George W. Bush-controlled Pentagon, where he was a member of a commission in the early stages of the administration, to advocate for a US military show of force directed at the Indonesian militias in West Timor. According to Clark, a US Marine vessel sailed near the border area with West Timor, openly displaying its weaponry and the US flag. Clark referred to this as 'military body language.' The militias soon ceased their cross-border probes. At this time, learning that the US planned on opening a Consulate rather than an Embassy in Timor-Leste, he exerted pressure through his contacts in the Bush administration for an Embassy to be opened in Dili upon independence in May 2002.

hosi Indonesia nia faillansu iha Timor-Leste, kona-ba nia relasaun ho comunidade internasionál, no liuliu ho Estados Unidus.’³⁶

Pickering fó nia testemuña katak esforsu diplomátiku hosi governu Clinton ‘mós agresivu. Prezidente Clinton komunika Amerika nia preokupasaun sira diretu no ba Prezidente Habibie rasik... Sekretária Estadu Albright hato’o ami-nia pontu-de-vista ba Prezidente Habibie no ba Ministru Estranjeirus Alatas ko’alia hosi telefone dala balu no mós liuhosi sorumutuk ho sira rasik. Nia mós ko’alia rasik ho Jenerál Wiranto. Sekretáriu [Defeza] Cohen haruka karta rua ba Jenerál Wiranto kona-ba Timor-Leste. Stanley Roth, Sekretáriu Estadu Adjuntu ba Asuntus Asia Orientál no Pasífiku nian, no Embaixadór Stapleton Roy haruka beibeik mós mensajem klaru ne’e ba lider senior Indonesia nian sira. Jenerál Shelton, Prezidente Xefia Konjuntu, telefone ba Jenerál Wiranto, no Jenerál Shinseki ko’alia ba nia kontra-parte Jenerál Subagyo dala barak iha krize ne’e nia laran.’³⁷ Autoridade balu Indonesia nian hatudu sira-nia hakarak atu mantéin (kaer nafatin) distritu lima hosi Timor-Leste nia parte Loromonu no husik distritu ualu ba Timoroan sira. Pickering fó-hatene iha públiku katak Indonesia labele buka hafahe Timor-Leste. Nia dehan katak laiha ‘baze morál, istória ka legál ruma ba estratéjia hafahe Timor-Leste. Husik ha’u deklara moos-moos: estratéjia ida-ne’e kontráriu ba planu sira ne’ebé Indonesia konkorda ona no mós comunidade internasionál sei la tolera.’³⁸

Governu, Clinton nian, hatudu momoos nia aten-brani atu impoin ordem iha Timor-Leste. Nia pronunsiamentu ofisiál kona-ba situaun iha Timor-Leste, ne’eduni, lori sinál ameasa ba Indonesia. Sekretáriu Defeza William Cohen hato’o adverténsia katak ‘komunidade internasionál iha alavanka/ai-suak barak ne’ebé ita bele uza. Konserteza sei lori konsekuénsia ekonómika boot mai.’ Porta-voz Departamentu Estadu James Rubin fó-hanoin mós nia audiénsia katak ‘Indonesia nia relasoens ho comunidade internasionál, ho Estados Unidus mós tama iha laran, iha hela risku laran... ami gasta dólar tokon atus-ba-atus ba dezenvolvimentu ekonómiku diretu ho Governu Indonesia nian no, momoos tebes, governu Indonesia nian simu dólar biliaun barak hanesan apoiu tuir akordu ho Fundu Monetáriu Internasionál. Fundu Monetáriu Internasionál hatudu tiha ona ninia monitorizasaun besik ba situaun iha Timor-Leste.’³⁹

³⁶ Thomas Pickering, *Testimony to the House Committee on International Relations and Senate Committee on Foreign Relations*, Federal Document Clearing House, 9 September 1999.

³⁷ Thomas Pickering, 9 September 1999.

³⁸ Thomas Pickering, 9 September 1999.

³⁹ J. Rubin, *Daily Press briefing*, US Department of State, 8 September 1999..

Prezidente Xefia Estadu-Maiór Konjuntu Jenerál Hugh Shelton dere arame ba Jenerál Wiranto. Tuir Shelton nia testemuñu ba Kongresu, 'ha'u hatete ba nia ho liafuan momoos saida mak ha'u hanoin ami presiza haree hosi Indonesia, no liuliu hosi nia.' Molok nia tama ba Air Force One hodi semo ba simeira APEC nian iha Auckland, Nova Zelândia, Prezidente Clinton fó-hanoin katak:

Mak Indonesia la hapara violénsia karik, nia tenke konvida – nia tenke konvida – comunidade internasionál atu tulun restaura fali seguransa. Nia tenke loke odamatan ba ajénsia ajuda internasionál sira atu tama ba tulun ema sira iha terrenu. Nia tenke la'o ba oin ho tranzisaun ba ukun-rasik an. Bainhira ita loke dalan ba votasaun no hosi ne'e ita hetan rezultadu ida klaru, inekívoka, ita labele hosi ne'e fila fali ba kotuk ...

Ita sei laran-kasian karik Indonesia nia rekuperasaun hetan naksobu ho faktu ida-ne'e, maibé liuhosi dalan ida-ne'e ka hosi dalan seluk, nia sei naksobu ho ida-ne'e mak sira la hadia karik ... ha'u nia deklarasaun hato'o momoos sinál kona-ba ha'u preparadu atu ba oin ho kestaun ekonómiku ne'e.⁴⁰

Hafoin, bainhira para ba reabastese iha Hickham, Baze Forsa Aérea iha Hawaii, Clinton simu informasaun hosi Admiral Dennis Blair kona-ba situasaun iha Timor-Leste, fresku hosi nia halibur ho Jenerál Wiranto. Nune'e, bainhira iha ona Air Force One iha nia viajem nia etapa ikus ba Auckland, Clinto fó-sai nia deklarasaun ida maka'as liután, hodi akuza TNI nia envolvimentu diretu: 'Momoos katak militar Indonesiu sira mak fó tulun no habrani violénsia hosi milísia sira... Ida-ne'e simplesmente buat ida ita labele simu.'⁴¹

Fundu Monetáriu Internasionál suspende kedan asisténsia finanseira hotuhotu ba Indonesia to'o kestaun Timor-Leste rezolidu. Prezidente Banku Mundiál, James Wolfensohn, hakerek ba Habibie kona-ba asisténsia finanseira ba Indonesia bele tama ba risku iha tempu oinmai. Nia hatete ba Habibie, 'Atu comunidade finanseira internasionál bele fó nafatin nia suporte tomak, importante tebes atu ita halo buat ruma lalais hodi bele restaura fali ordem, no ita-nia governu kumpri nia promesa públiku atu respeita referendu nia rezultadu.' Iha debate emerjénsia iha Konsellu Seguransa UN nian, iha loron 12 setembru 1999, mak US nia

⁴⁰ W. Clinton, *Statement on Timor-Leste – Washington, DC*, Voice of America, 9 September 1999.

⁴¹ W. Clinton, *Timor-Leste Statement - Hawaii*, Voice of America, 9 September 1999.

enviadu Richard Holbrooke foin ‘aviza Indonesia katak sira to’o ona “pontu ida ne’ebé fila ba kotuk lad’ak iha relasoens internasionais” mak sira la simu karik forsa internasionál manutensaun paz.’⁴²

Militár Indonesiu sira-nia ulun-toos, (rezisténsia) lakon kedas iha de’it oras balu nia laran. Iha lora 12 setembru 1999, Habibie ho Wiranto sai hosi sorumutuk espesiál ida iha Gabinete. Ba kámara no mikrofone mídia internasionál, ne’ebé halibur iha ne’ebá, nia oin, Habibie hatete sai katak nia governu desidi husik forsa UN nian tama Timor-Leste. Ho Wiranto hamriik iha Habibie nia sorin, atu hatudu sinál moosmoos ida katak militár sira konkorda atu fó apoiu ba nia desizaun. Indonesia halo tentativa ikusliu atu hasai tiha Australia hosi forsa ne’e, hakarak nia mak hili sé mak sei halo parte grupu ne’e, maibé tentativa ida-ne’e rezolidu kedas ho US nia insisténsia públiku katak labele Indonesia mak ‘sei hili sé mak tama ka latama iha forsa ne’e no forsa nia estrutura sei oinsá.’⁴³

Ho halo lobby kosarmetan suli ba Amerikanu sira, governu Australia mós buka halo lalais kedas buat sira ne’ebé, foin fulan balu liubá, nia la fó ulun atu halo – organiza atu haruka tropa sira. Sira-nia ánsia – no ignoránsia – halo planeador Australianu sira hahú ho fó kedan naran IFET (International Force – Timor-Leste) ba forsa manutensaun paz ne’e. Maibé tuirmai dehan ba sira katak IFET ne’e akrónimu ba International Federation for Timor-Leste – koligasaun ativista no grupu sira ne’ebé uluk halo kampaña pro Timor-Leste iha tinan barak nia laran. Akrónimu ne’e muda tiha ba INTERFET. Tenke halosu (enfatisa) katak governu Howard iha tempu tomak, nia planeia hela oinsá atu evakua testemuña internasionál sira, la’ós atu haruka forsa manutensaun paz tama. Ezemplu ida ne’ebé bele halo moos liután pontu ida-ne’e.

Fó-han tropa sira

Tropa sira Australia nian, fofoun hanoin sira atu ba Timor-Leste, hela de’it oras balu no fila kedas. Sira hanoin atu semo ba Timor-Leste, foti ema estranjeiru balu, no voluntáriu balu, no Timoroan selesionadu balu, no lori sira sai hosi Timor-Leste. Ne’eduni laiha planu ruma atu fó ai-han fresku ne’ebé tenke iha hodi bele sustenta sira-nia hela. Bainhira momoos

⁴² T. Dodd and P. Hartcher, “Humiliation for Jakarta”, *Australian Financial Review*, 13 September 1999, p. 1.

⁴³ H. McDonald, “Conditions on foreign force could limit Australia’s role”, *Sydney Morning Herald*, 13 September 1999, p. 1.

ona katak públiku nia hirus sa'e maka'as mak obriga governu atu hala'o operasaun hametin paz, sira hosi lojística Forsa Defeza Australiana haka'as an hodi buka fó ai-han fresku ba forsa sira. Iha segunda dader, 20 setembru 1999, bainhira tropa Australianu sira tuun ona iha Díli, soldadu senior ida naran Tony Feeney simu xamada ida hosi telefone iha nia servisu fatin iha Singleton, NSW. Feeney uluk nia Inspetór Senior Ai-han ba Ezérsitu, iha experiénsia tinan 17 servisu iha lojística. Sira hatete ba nia tenke semo ba Darwin iha loraon 24 setembru atu ba organiza fornesimentu ai-han ba tropa sira, ne'ebé mak mobilizadu maibé laiha hahán fresku. Oras ida liu tiha, nia simu xamada ida tan hosi telefone, dehan ba nia katak nia tenke ba ona iha loraon-kuarta, 22 setembru. Ladauk liu tan oras ida, nia simu tan xamada ida hosi telefone, hatete ba nia tenke ba kedas ona iha loraon tuirmai, loraon-tersa 21 setembru. Minutu balu liu tan, nia simu xamada ida tan hosi telefone, hatete ba nia katak nia tenke ba kedas loraik ne'e. Kareta ida sei mai foti kedas nia. Nia sei ba Sydney no semo hosi ne'e ba Darwin. Nia sei hela iha Darwin to'o nia organiza hotu ona ai-han fresku ba kontinjente tomak, ne'ebé iha soldadu rihun balu. Momoos kedas, sira ne'ebé halo planu ne'e lufu-lafu loos atu kumpri sira-nia misaun foun. Feeney despede nia kaben no nia xefi, no arruma nia mala tuir nia bele. Nia to'o iha Darwin iha loraon-tersa dadersán. Iha ona Darwin, nia liu kedas ba Unidade Konjunta Lojística, iha ne'ebá iha fatin ida ba nia atu halo servisu no iha mós liña telefone ida. Nia hahú ko'alia kedas ba fornesedór ai-han fresku sira. Unidade ne'ebé baibain lida ho fornesedór lokál sira, ba tia ona Dili, halai-fuik, ne'eduni laiha tan especialista ruma lojística militar nian iha portu Darwin, ne'ebé bele prepara kontratu ne'ebé tenke halo molok hala'o operasaun boot sira hanesane'e.

Feeney hetan produktu fresku (ai-fuan, modo no paun) hosi mersearia no padaria sira iha Darwin, no seluk mai hosi fornesedór iha Perth, Adelaide, Brisbane, Sydney no Melbourne. Fornesedór ida ho naran Albatross Marine iha oferta permanente (standing offer) ho Departamentu Defeza iha Northern Territory. Tanba limitasaun tempu, Feeney nunka iha tempu atu halo kontratu tuir prosesu aprovizionamentu normál. Maibé nia ho nia ekipa halo de'it emenda ba kontratu permanente sira ne'ebé iha ona, no haruka ba autoridade relevante sira iha Baze Naval Darwin, atu sira asina kontratu. Maibé operasaun tomak – forsa manutensaun paz, la'ós evakuasaun – inesperadu loos mak halo Albatross Marine laiha finansas ne'ebé sira presiza iha, hodi ba sosa sasán sira presiza. Nia tau forsa hamutuk ho kompañia bazeadu iha West Australia naran Sealanes, ne'ebé mak iha osan natotón. Sealanes ho Albatross Marine harii kompañia foun ida, naran Albatross Timor, ho propóritu loloos atu kumpri forsa sira-nia nesesidade. Sasán tenke halo lais tebetebes, ne'ebé la halo uluk kontratu

hodi formaliza arranju sira-ne'e. Kontratu sei la asina to'o semana haat hafoin sasán entrega tia ona. Ró-ahi Mariña Real Australiana nian ne'ebé atu transporta rasaun hirak ne'e, labele halo tanba nia mós okupadu loos atu kumpri ho aspetu seluk misaun manutensaun paz nian. Ne'ebé rasaun sira ne'e despaixa hosi ró-ahi merkantil ida ne'ebé bele lori kontentór sira. Liu tiha loron 23, hafoin tropa sira tuun iha rai-maran, mak karregamentu da'uluk ho produhu fresku foin sai hosi Darwin.

Pontu iha ne'e la'ós misaun mak boot liu tiha planeadu, ka mosu buat balu la esperadu ne'ebé mak planeadór sira tenke simu. Senáriu ruma nune'e ema tomak sei nota, tanba buat sira inesperadu mosu iha operasaun militar ne'ebé de'it. Hosi sorin kontráriu, pontu maka planu atu nunka haruka forsa manutensaun ruma. Atu evakua observadór sira, nune'e, militar indonesiu sira bele halo sasán laiha ema ida haree henesan testemuña. Experiénsia hosi partisipante barabarak konfirma ida-ne'e.

Komunidade internasionál no liuliu governu Howard, tenke hatama duni misaun manutensaun paz ba Timor-Leste tanba presaun hosi laloran indignasaun públiku no presaun hosi setór influente sira iha US nia Kongresu laran, no hosi mídia. Presaun ida-ne'e la mosu derepentini de'it, maibé mosu hanesan rezultadu hosi tinan 24 kampaña internasionál hosi ativista sira, ne'ebé, sira-nia papél importante ba Timor-Leste nia ukun-rasik an ladún hetan rekoñesimentu loloos.

Kuandu Indonesia sai hosi Timor-Leste iha fulan setembru 1999, governu Australia foti kedan medidas no subsubar atu buka manán vantajem ruma ba Timor-Leste nia rikusoin Minarai no Gaz.

Situasaun relevante lubuk oan ida maka Indonesia asina Tratadu Timor Gap ho Australia iha tinan 1989, hodi loke dalan ba país rua ne'e bele explora Tasi Timor nia rekursu enerjétiku. Ho Timor-Leste nia mosu hanesan estadu independente mak mai halakon Tratadu Timor Gap. País nia lider sira deklarasaun katak sira "sei lakohi sai kontinudadór ba tratadu ida ilegál." Australia hatete nafatin katak nia iha direitu ba rikusoin sira ne'ebé nahe-án iha plataforma kontinentál nia leten to'o ba 'Timor Trough'- tasi klean boot ne'ebé besik Timor-Leste nia kosta sul 'millas náutikas' 40 de'it.

Médiku no ativista Australianu ida naran Andrew McNaughtan husu opiniaun legál hosi peritu nain tolu kona-ba Timor-Leste nia potenciál direitu marítimu tuir lei marítimu internasionál: Professor Vaughan Lowe hosi Oxford University, Comandante Chris Carleton hosi U.K. nia Hydrographic Office no Advogadu Australianu Chris Ward. Sira-nia opiniaun legál hatudu katak Timor-Leste nia potenciál fronteira marítima – ne’eduni rikusoin gaz no minarai – boot dook liu ne’ebé mak Australia alega daudaun. Liuliu, sira bolu atensaun ba desizaun hosi International Court of Justice kona-ba kazu ida entre Libia no Malta iha 1985. Libia kaer ba prinsípiu prolongamentu naturál nia plataforma kontinentál, maibé Malta bazeia ba prinsípiu ekuidistánsia – liña klaran – entre país rua ne’e. ICJ rejete Libia nia argumentu, no dehan katak independente hosi sá jeolojía marítima de’it, país rua hotu iha direitu bazeadu ba ekuidistánsia.⁴⁴

Ward, Carleton no Lowe deklara katak Timor-Leste ho Australia nia preokupasaun ba jeolojía no jeofízika iha tasi okos Timor Trough nian la importa – fronteira marítima tenke bazeia ba liña klaran entre sira rua. Sira-nia opiniaun legál ne’e nia esbosu sirkula iha fulan marsu 2002, fulan tolu molok Timor-Leste atu hetan nia independénsia formál. Governu Australianu sai kedas – no la fó-hatene Parlamentu Australianu – hosi jurisdisaun fronteira marítima *International Court of Justice* nian no hosi *International Tribunal on the Law of the Sea*. Nia lakohi tama iha risku ruma maihosi dezafiu legál ruma bele hamosu. Nia análize interna hatete katak “laiha konsulta ba Governu Federál nia li’ur” kona-ba desizaun sai hosi ne’ebá tanba “Públiku nia hatene kona-ba proposta ne’e, bele karik halo país seluk antesipa deklarasaun hodi hahú halo asaun ruma hasoru Australia kona-ba fronteira marítima.”⁴⁵

Australia atu asina ona, ho Timor-Leste, Tratadu Tasi Timor iha loron 20 maiu 2002, nia sei fó avizu katak projetu minarai no gaz iha kampu minarai Bayu Undan, dook milla náutika 135 hosi Timor-Leste nia kosta sul, sei la’o de’it ba oin bainhira Tratadu asina ona. Australia tuirmai rekuza atu ratifika Tratadu Tasi Timor, nia sei ratifika de’it bainhira Timor-Leste simu atu asina International Unitization Agreement (IUA).

⁴⁴ ICJ, Case Concerning the Continental Shelf Libyan Arab Jamahiriya/Malta, Judgment of 3 June 1985. <http://www.icj-cij.org/files/case-related/68/068-19850603-JUD-01-00-EN.pdf> accessed January 10, 2018.

⁴⁵ DFAT, *National Interest Analysis, Australian declarations under Articles 287(1) and 298(1)(a) of the United Nations Convention on the Law of the Sea 1982, lodged at New York on 22 March 2002*. Available at Lao Hamutuk <https://www.laohamutuk.org/Oil/Boundary/2002/unclonia.pdf> accessed January 15, 2018.

Entretantu iha loron 20 setembru 2002, governu Australianu fó kontratu explorasaun ba área ida sorin-balu tama iha Timor-Leste nia sorin hosi liña klaran. Timor-Leste halo duni protestu maibé nia labele rekorre ba *International Court of Justice*.

Biar nune'e, iha fulan novembru 2002, Sr Downer fó-avizu ba Primeiru-Ministru Timor-Leste nian katak Australia bele halo gaz hosi Tasi Timor atraza atu halai ba Timor-Leste ba tinan sanulu nune'e nia laran. Nia dehan, tuir transkrisaun ida hosi gravasaun negosiasaun nian, 'Ita la'ós obrigadu atu explora kedas rikusoin hirak ne'e.' Bele hela nafatin iha ne'ebá ba tinan 20, 40, 50 nia laran. Ami ulun-toos tebetebes. Ami sei la importa karik ita bele fó-hatene informasaun ba mídia sira. Husik ha'u fó lai tutoriál oan ida kona-ba polítika – laiha possibilidade ruma.' Iha fulan dezembru 2002, parseiru sira iha projetu Sunrise, Woodside, ConocoPhillips, Shell no Osaka Gas, fó-hatene projetu nia atrazu indefinidu, tátika ida momoos atu presiona Timor-Leste bele simu Sr Downer nia ezijénsia sira.

Pontu prinsipál iha ne'e maka Sr Downer ho Woodside hakarak obriga Timor-Leste, hanesan país ida entre sira kiak liu iha mundu, atu entrega de'it reseita barak liu hosi Projetu Greater Sunrise – reseita ne'ebé karik bele ba halo sasán barak liu, hanesan atu bele tau-matan mós ba taxa mortalidade infantil.

Iha tempu ne'e mós, governu Australianu rekuza atu tuur ho Timor-Leste hodi halo negosiasaun ba fronteira marítima. Iha konversasaun iha Darwin iha tinan 2003, Timor-Leste haruka ekipa negosiadór ida kompletu ho mandatu atu hala'ó negosiasaun ho substánsia kona-ba fronteira marítima permanente. Hosi sorin seluk, Australia haruka de'it ekipa ida ho ema nain tolu. Timor-Leste husu atu halo diskusaun fulan-fulan, maibé Australia - la'ós buat atu ita fiar - reklama katak iha rekursu natotón de'it ba halo diskusaun tinan ida dala rua. Timor-Leste oferese atu finansia Australia nia despeza, maibé sira la simu oferta ne'e.⁴⁶

Movimentu Kontra Okupasaun Tasi Timór mosu iha Timor-Leste iha fulan abril 2004. Movimentu ne'e dehan, "Ami hanoin okupasaun estranjeira ba ami-nia Territóriu kotu ona iha tinan 1999. Ami la hein atu hamriik hosi Indonesia nia okupasaun fakar-ran ba ami-nia rain sei hasoru fali Australia okupa ho matan-kaklosu ba ami-nia tasi. Ami fiar katak Australia, ho nia

⁴⁶ Shawn Donnan, "Australia Accused of Stalling Boundary Talk," *Financial Times*, November 27, 2003; James Ensor, "Coalition credibility with Australia's elastic borders," *SMH*, November 27, 2003;

tradisaun demokrátika no neon boot, sei iha morál utoan no ladún kruél hanesan rijime militár Suharto nian.” 47

Timor-Leste nia ‘think tank’ di’ak liu, Lao Hamutuk, kritika governu Australia nia hahalok, hanesan mós ativista lokál balu, maibé NGO barak hosi Australia la lokeibun (silénsiu) halo ema hotu haree momoos kedas. Ba Timor-Leste atu dezenvolve loloos, sei presiza tebes Timor-Leste atu explora rasik ninia rikusoin gaz no minarai, no governu Australia ho nia hahalok hanesan atu taka dalan ba Timor-Leste bele halo rasik ida-ne’e mak hamosu kritika naba-naba hosi ema Australianu sira ne’ebé hatete beibeik katak sira preokupa ho dezenvolvimentu. Maibé sira-nia modelu negósiu fiar liu ba kontratu sira ne’ebé Australia nia ajénsia ajuda sira fó. Sira-nia projetu sira mak responsável ba governu estranjeiru no doador privadu, ne’ebé mak halo monitorizasaun ba sira-nia dezempeñu no disponiiliza fundus tuir sira-nia prioridade rasik. Haree ba sira-nia hahalok, NGO hirak ne’e dala barak atrai ema sira-ne’ebé bele hakerek proposta finansiamentu nakonu ho liafuan sira “empoderamentu” no “capacity-building”. Iha exsesaun onrada balu, klaru, maibé iha jerál, NGO sira-nia modelu ba implementa de’it projetu iha rai-li’ur, laran-metin de’it atu bele relasaun di’ak ho ajensia ajuda sira Australia nian. Atu envolve fali iha luta lokál no movimentu sosiál, liuliu sira-ne’ebé bele dezafia fali DFAT nia objetivu, ida-ne’e la’ós ona kestaun ruma ba sira.

Iha tinan 2005, Australia anula tiha sira-nia kompromisu atu tulun NGO Timorensen ida ne’ebé mak husu ba Australia atu respeita Timor-Leste nia soberanía no hahú tuur ho Timor-Leste hodi ko’alia kona-ba fronteira marítima. Ajénsia ajuda Australiana ida asina kontratu ho Forum Tau Matan (FTM), NGO Direitus Umanus Timorensen ida, ho valór \$65.830. Osan ladauk disponibiliza bainhira AusAid rona katak FTM mós asina komunikadu imprensa ne’ebé eziji “hakarak hetan solusaun justu ba fronteiras marítimas.” AusAid fó-hatene FTM katak sira atu anula kontratu tanba sira sei “haree-hikas oinsá sira halo kontratu ho NGO sira iha setór oiain.” Xefi programa ajuda Australia nian iha Timor-Leste, Peter Ellis, tuirfalimai hakerek katak nia simu “presaun hosi ema balu, liuhosi ko’alia no hakerek, lalika hatete razaun loloos ba Forum Tau Matan, no atu – nafatin duni – kaer metin lista-negra sekreta hanesan baze ba halo desizaun kona-ba finansiamentu iha loron aban-bainrua.” Nia simu informasaun katak NGO

⁴⁷ Movement Against the Occupation of the Timor Sea, Statement of April 14, 2004. Available at <http://etan.org/news/2004/04move.htm> (accessed January 27, 2018.) See also Andrew McNaughtan, *Submission to the Joint Standing Committee on Treaties concerning the ‘Agreement Relating to the Unitisation of the Sunrise and Troubador Fields*, June 16, 2003. JSCOT Report 53: Treaties tabled in May and June 2003.

balu impedidu atu simu finansiamentu “hanesan ho kandidatu sira politikamente inaseitável, aparentemente tuir rotina (ilegalmente) eskluídu hosi eskolla atu tama ba funsionáriu ba Funsauun Públika Australia nian. “ Nia la simu buat ida-ne’e, no nia hatete lialoos ba FTM. Ellis simu retaliasaun iha funsauun públika ba nia hahalok sira nune’e. Tékniku estatístiku ida, nia sai tiha hosi AusAid no muda ba Nova Zelândia, iha ne’ebá nia sai fali sientista dadus dí’ak ida.⁴⁸

Governu Australianu rekorre ba (ASIS) Australian Intelligence Service, nia ajénsia espionajem ba intelijénsia umana ne’ebé halibur intelijénsia iha rai-li’ur hosi Australia. Tuir informasaun ne’ebé mak to’o iha públika nia koñesimentu tinan balu liu tiha, alega katak ASIS uza kobertura projetu ajuda ida nian hodi instala dispozitivu eskuta balu iha gabinete ministériu balu Timor-Leste nian. Dispozitivu hirak ne’e ajente sekretu ida mak loke no taka iha edifisu laran. Tuirmai sira haruka gravasaun hosi sinál mikro-ondas ba baze eskuta sekreta ida, ne’ebé mak sira instala subsubar iha Otél Central Maritime, ‘floating otél’ ida ho kuartu 127, ancoradu hela iha kais, dook kilómetru sorin-balu ida nune’e. ⁴⁹ Gravasaun dijital ne’e tuirmi sira lori liuhosi sidade laran ba Embaixada Australiana, no haruka ba Canberra ba sira analiza. Operasaun espionajem ida-ne’e fó ba Australia asesu sekretu ba desizaun interna Timor-Leste nian no sira-nia pozisaun ba negosiasaun. Ho hatene uluk tiha parte sorin-balu nia pozisaun mak Australia bele antesipa saida mak Timor-Leste preparadu atu kompromete, no membru sira ne’ebé mak hanoin oin-seluk ho liña ofisiál. Nune’e sira bele oferese insentivu ruma ba sira-ne’e laho sira-nia kolega seluk hatene. Ofisiál ISIS nian ida la halo tan abordajem inisiál ruma; servisu intelijénsia aliadu, dala ruma, taka malu atu bele haforti liután negasaun.

Presauun rua hotu, naklolle ka helik, sira rua ne’e nia forsa hamutuk mak obriga Timor-Leste asina Tratadu “Certain Maritime Arrangements in the Timor Sea” iha tinan 2006 no tuirmai ratifika iha tinan 2007. Koñesidu nu’udar CMATS, ida-ne’e fahe rikusoin minarai no gaz entre Australia no Timor-Leste – rikusoin ne’ebé mak sei Timor-Leste nian tomak, karik Australia la dada-án tiha hosi ICJ nia jurisdisaun ba fronteira marítima. Hosi 19989 to’o 2018, governu Australianu asai Timor-Leste nia soin hosi reseita minarai besik tokon rihun US\$8

⁴⁸ Peter Ellis, *Submission to the Inquiry into whistleblowing protections by the House Standing Committee on Legal and Constitutional Affairs*, August 7, 2008.

⁴⁹ Marian Wilkinson and Peter Cronau, *Drawing the Line*. Photo by La'o Hamutuk http://www.laohamutuk.org/Bulletin/2005/Apr/bulletinv6n1.html#Solidarity_Central

(bilian 8).⁵⁰ **Hanesan Timor-Leste mak Australia nia doador boot liu. Ida-ne'e la'os hakerek númeru mak sala.** Iha fulan marsu 2018, hafoin konsiliasun obrigatóriu iha prosesu Nasoens Unidas nian, Australia no Timor-Leste asina tratadu ida hodi hatuur fronteira marítima permanente iha liña kosteira país rua nia klaran loloos. Iha ne'ebá hatuur katak sei laiha kompensasaun ruma ba explorasaun sira ne'ebé halo tiha ona iha tempu kotuk.

Iha tinan 2019, sidadaun Australianu nain rua hasoru prosesu iha tribunál Australia nian. Ida ex-ofisiál senior ajensia espionajem Australia nian, ne'ebé mak kesar buat barak no hasoru mós operasaun espionajem iha Timor-Leste. Ida seluk maka Bernard Collaery, nia advogadu.

⁵⁰ http://www.laohamutuk.org/Oil/Boundary/laminaria_revenues.htm